


廿二史攷異
二





A decorative border with a central illustration of a horse running on clouds. The horse is black and facing left, with a saddle and reins. It is surrounded by stylized, swirling white clouds. The border itself is composed of a repeating pattern of black and white swirling motifs.

異攷史二十

(二)

撰昕大錢

廿二史考異卷七

漢書二

律麻志上

徵、祉也。徵祉聲相近。故徵有祉音。

林君也。釋詁文。

應鍾言陰氣應亡射。該臧萬物。而雜陽闔種也。孟康曰。陰雜陽氣臧寒。爲萬物作種也。按。應鍾。十月之律。於消息爲純陰卦。而八卦之位。乾在十月。是爲陰雜陽氣也。坤之上六云。龍戰於野。其血玄黃。而文言傳以爲天地之雜。莊氏謂上六之爻。兼有天地雜氣。故血有天地之色。

三十斤爲鈞。四鈞爲石。忖爲十八。易十有八變之象也。孟康曰。忖。度也。度其義有十八也。黃鐘侖銖兩鈞。斤石凡七。與下十一象爲十八也。按。孟說非也。一鈞重萬一千五百二十銖。以易六十四卦之數除之。得一十有八。合於易之十八變而成卦也。

迺以前麻上元泰初四千六百一十七歲。至于元封七年。復得闕逢攝提格之歲。中冬十一月甲子朔旦冬至。日月在建星。太歲在子。按。太初元年。太歲在丙子。東漢以後。術家不知太歲有超辰之法。上溯

太初之元。以爲丁丑。非太初本法也。其云闕逢攝提格之歲者。謂是年歲陰在甲寅也。歲陰與太歲皆百四十四歲而超一辰。故四千六百一十七歲而復其初。秦漢之間。多以歲陰紀歲。淮南子言。太陰在寅。名曰攝提格。史記貨殖傳。太陰在卯之類是也。東漢始專用太歲。而去其超辰之法。故於此文多不了了。唐一行日度議云。漢太初元起丁丑。推而上之。不值甲寅。猶以日月五緯。復得上元本星度。故命曰闕逢攝提格之歲。而實非甲寅。此亦強作解事語。觀太初詔書。固云年名焉。逢攝提格矣。安得云實非甲寅乎。劉敞云。十七歲當作十一歲。此亦妄說。二劉於推步本無所解。宋子京所引景本。亦無一不誤。今不復辨也。

又妄言太初麻虧四分日之三。去小餘七百五分。按黃帝六家之術。太略皆與四分同。四分以九百四十爲日法。九百四十之七百五。正四分之三也。則壽王術日法亦同四分矣。

參閏法爲周至。以乘法。法以減中法而約之。則六劫之數。爲一月之閏法。其餘七分。此論中月相求之

理也。周至五十七。以乘法。法得十三萬六千三百四十四。與中法十四萬五百三十相減。餘四千一百八十六。是爲一月之閏法。蓋中法以滿元法。四千六百爲一日。置中法以元法除之。得三十日。又四

周至乘月法。則亦以滿元法爲一日。置十三萬六千三百四十四。以元法除之。得二十九日。又四

相減之餘。卽中多於朔之數。而爲一月之閏分也。六劫當作七劫。置四千一百八十六數。以通法除之。

得七而通法又卽一劫之數。月法二千三百九十二爲再劫兩之數。則一月之閏法爲七劫之數矣。歲數則通法五百九十八者一劫之數也。有閏餘十九分之七。析之則每月有閏餘二百二十八分之七也。

易九厄曰。初入元百六。陽九次三百七十四。陰九。孟康曰。易傳也。所謂陽九之厄。百六之會也。按九厄當作无妄。易雜卦傳无妄災也。京房說无妄以爲大旱之卦。萬物皆死。無所復望。應劭云。天必先雲而後雷。雷而後雨。今無雲而雷。无妄者。无所望也。萬物無所望於天。災異之最大者也。漢儒引伸其義。故有陽九陰九經歲災歲之說。此亦緯書之類。孟康以爲易傳。猶稽覽圖稱中孚傳也。谷永傳。遭无妄之卦運。直百六之災。隄論衡明零篇云。災變大抵有二。有政治之災。有無妄之變。德艷政得。災猶至者。無妄也。德衰政失。變應來者。政治也。又云。無妄之氣。歷世時至。又云。非常之變。無妄之氣。閒而至也。水氣閒堯。旱氣閒湯。恢國篇云。建初孟年。無妄氣至。須頌篇云。成湯加成。宣王言宣。無妄之災。不能虧政。寒溫篇云。按易無妄之應。水旱之至。自有期節。三國志注。公孫淵上孫權表。伏惟遭天地反易。遇無妄之運。劉淵林注。吳都賦。引漢書此條。正作易无妄。可證魏晉時本尙未誤。李善注文選。屢引此文。並作陽九厄。則唐時已譌。不始於近代矣。无妄譌爲九厄。蓋字形相涉。或并改易爲易。以傳會陽九之文。不知水旱之災。陽不必九。九不獨陽也。

凡十二次。日至其初爲節。至其中斗建下爲十二辰。斗建上當有爲中二字。蔡邕月令章句。周天三百

六十五度四分度之一。分爲十二次。日至其初爲節。至其中爲中氣。

孟仲季迭用事爲統首。寅申己亥爲四孟。子午卯酉爲四仲。丑未辰戌爲四季。故甲申曰孟統。甲子曰仲統。甲辰曰季統。淮南天文訓。木生於亥。壯於卯。死於未。火生於寅。壯於午。死於戌。金生於巳。壯於酉。死於丑。水生於申。壯於子。死於辰。孟仲季之序。蓋因於此。

律麻志下

積中七。中餘千七百一十八。當云積中十。

東九西七乘歲數。并九七爲法。得一金水晨夕歲數。金水晨見伏在東方。夕見伏在西方。約其率。則晨見十六分之九。夕見十六分之七。故以十六爲總法。以九乘歲數。十六除之。得晨歲數。七乘歲數。十六除之。得夕歲數也。

壹見三百九十八日五百一十六萬三千一百二分。劉敞曰。三百九十八日五百一十六萬三千一百二分者。通計上文見伏之日分也。今作壹見字。疑後人妄改之。按。木土火稱一見者。以見統伏也。今水稱一復者。以復該晨夕也。上文見中法下。分注見數復數。其義已明。此下又有推五星見復之術。劉氏俱未檢照。輒疑後人妄改。甚違蓋闕之義。

日行四十六分度四十三。四十三當作三十三。

日行三分度一六日而伏。三分當作二分。

壹復五百八十四日百二十九萬五千三百五十二分。劉敞曰。此又妄改爲壹復。自是通計晨夕見伏之

日分也。說見上。

百三十七日千七百一十七萬一百七十分。土星伏三十七日有奇。上百字衍。

伏日行不盈九十二分度七十三分。下分字衍。

十七日順疾。十字衍。

盈元法除之餘不盈統者。統當作元。

以章月乘人統歲數。人當作入。

以十二乘閏餘。加十得一。加十當作加七。

以算餘乘人統歲數。算當作策。人當作入。

求八節。加大餘四十五。小餘千一百。林文炳曰。當作小餘千一十。林說是。

求二十四氣。三其小餘。加大餘十五。小餘千一十。林文炳曰。當云加大餘十五。三分其小餘千一十。按。

林說非也。千一十之數。三分之。則有畸零。不可入算。故三倍其小餘。本以統法爲日法。今以元法爲日

法也。上云千一十者。一千五百三十九分日之餘。此云千一十者。四千六百一十七分日之餘。

推中部二十四氣。皆以元爲法。部疑節之譌。

所得起其正算外。則食月也。其當作天。

盈見中法得一。則積中法也。下法字衍。

不盈者。名曰月中餘。中字衍。

中次至日數。次以次初數。中次之次當作以。

加後餘於中餘。後下當有中字。

數如法。則見中也。數下當有除字。則下當有後字。

推至日及入中次度數如上法。次下當有日字。

推朔日及入月數如上法。月下當有日字。

以六十除餘積次。餘字衍。

算盡之外。則太歲日也。日字誤。當云太歲所在。

六物者。歲時數日月星辰也。數字衍。

斗二十六。此下當有三百八十五分六字。賈逵云。太初厯斗二十六度三百八十五分。姜岌云。三統以一千五百三十九分之三百八十五爲斗分。蓋周天以牽牛起算。終於南斗二十六度。所有零分。歸於

斗度之末。故曰斗分。此斗分字當是分注。後人傳寫失之。

北九十八度。此下亦當有三百八十五分六字。

四分上元至伐桀十三萬二千一百一十三歲。按四分之術。至後漢始行。今劉子駿三統術亦著其說。

則西京已有之矣。淮南天文訓所述甲寅元亦與四分同。

壬辰晨星始見。師古曰晨古晨字也。其字從白。白音居玉切。按說文晨晨二字有別。晨夕字。从白。晨爲

房星。从晶。當作晨。或作晨。省文也。此晨星者水星也。亦从白。

丙午還師。還當作逮。

世家。煬公卽位十六年。汲古閣本作六十年。是也。史記魯世家。煬公六年卒。六下亦脫十字。

是歲。距上元十四萬二千五百七十七歲。按自上元盡僖公五年。得十四萬二千五百七十七歲。凡言

距算者。皆外所求。則七十七歲當作七十六歲。

王莽居攝。盜襲帝位。自此以下。皆班氏所增入。非劉歆本文。上文初元元年。距建武七十六歲。亦班氏

增入也。

改元曰建武。歲在鶉尾之張度。按光武建武元年。距上元十四萬三千二百五十五歲。滿歲星歲數去

之。歲餘一千五百五十九。以百四十五乘之。得二十二萬六千五十五。滿百四十四而一。得積次一千

五百六十九。次餘百以十二除積次餘數九。從星紀起算外。則歲在壽星也。又以六十除積次餘數亦九。從丙子起算外。則太歲在乙酉也。志云歲在鶉尾之張度者。蓋以太初元年歲在星紀。距是歲一百二十八算。未盈超辰之限。故約略計之。以爲當在鶉尾耳。若以密率求之。則太初改元。歲星在婺女六度。已是星紀之末。歲星每年多行一分。至太始二年。歲星已度壽星而入大火。卽太歲亦超乙酉而在丙戌矣。王莽傳。建國五年。歲在壽星。倉龍癸酉八年。歲躔星紀。天鳳七年。歲在大梁。倉龍庚辰。厥明年。歲在實沈。倉龍辛巳。據此。推至光武建武元年。正當在壽星之次。此實算也。翼奉以元帝初元二年上封事。云今年太陰建於甲戌。此太陰卽謂太歲。

禮樂志

後董仲舒對策言。王者欲有所爲。宜求其端於天。按。仲舒對策。已見本傳。而志復載其文至四百言。王吉疏已見本傳。而志復載其文至百五十餘言。司馬遷言李陵事。已見遷傳。而陵傳又載其文百五十言。元帝初元二年地震下詔。已見本傳。而翼奉傳又載其全文。

沸愈甚而無益。俞古愈字。

是故纖微焦瘁之音。作注。瘁一作衰。樂記作志微。嘒殺之音。鄭氏解志微爲意細。似曲。當依此文作纖。纖與識字形相涉。而志又識之古文。遂譌爲志耳。衰殺聲相近。較之瘁字爲長。

以營亂富貴之耳目。營與熒通。營亂猶惑亂也。師古訓回繞似非。建始元年丞相匡衡奏罷鸞路龍鱗。更定詩曰涓選休成。按志云奏罷者謂去鸞路句。改爲涓選休成也。下章云奏罷黼黻周張。更定詩曰肅在舊典。亦謂去黼黻句。改爲肅若舊典也。郊祀志成帝初卽位。丞相衡等奏定南北郊。又言甘泉泰畤紫壇有文章采鏤黼黻之飾。石壇仙人祠瘞鸞路駟寓龍馬。不能得其象於古。宜皆勿修。故更去鸞路龍鱗。黼黻周張二語。其餘仍用舊文也。監本以涓選休成句屬天地章。以肅若舊典句屬日出入章。此誤之甚者。然文獻通考載元豐六年判太常寺陳薦議引郊祀歌涓選休成。天地竝況。證天地合祭之說。則北宋本已誤矣。

刑法志

孝文二年左右丞相周勃陳平奏言。按公卿表。孝文元年十月右丞相陳平爲左丞相。太尉周勃爲右丞相。八月勃免。平獨爲丞相。二年十月丞相平薨。十一月勃復爲丞相。是平勃同爲丞相在元年。非二年也。文帝紀元年十二月除收帑相坐律。正平勃並相之時。志云二年誤。

食貨志上

燦木爲朮。宋祁曰。燦木當爲揉木。按說文。燦。屈申木也。揉字說文不收。當以燦爲正。史漢多古字。率爲校書人妄改。子京猶不免爾。何況餘子。

三歲更耕之。自爰其處。按春秋傳。晉於是乎作爰田。服虔孔晁皆云爰。易也。說文。爰作起。起田。易居也。張湯傳。傳爰書。師古訓。爰爲換。換與易同義。

還廬樹桑。師古曰。還繞也。還與環同。

其詩曰。有滄淒淒。興雲祁祁。按韓詩外傳引詩。亦作興雲祁祁。漢無極山碑。亦有興雲祁祁。雨我公田。

遂及我私之文。蓋漢世經師傳授皆然。顏之推家訓云。詩有滄萋萋。興雲祁祁。毛傳。滄。陰雲貌。萋萋。雲行貌。滄。已是陰雲。何勞復云興雲。雲當爲雨。俗寫誤爾。班固靈臺詩云。習習祥風。祁祁甘雨。此其證也。之推仕南北朝。雖疑雲爲誤字。不聞據他本以正之。則六朝本亦皆作興雲矣。大雅韓奕篇云。祁祁如雲。可證祁祁爲雲行貌。非轉寫之誤。後漢書左雄傳。作興雨祁祁。或後人校改。

大命將泛。孟康曰。泛音方勇反。宋祁曰。勇當作濫。按方勇卽泛之轉聲。說文。風从凡聲。而汎亦有馮音。今人呼帆爲篷。亦聲之轉也。宋子京不知古音。故疑其誤。民俞勤農。俞古愈字。下文貧弱俞困。民俞窮困之俞竝同。

食貨志下

孔僅使天下鑄作器。三年中至大司農。列於九卿。而桑羊爲大司農中丞。管諸會計事。按百官公卿表。大農令太初元年更名大司農。此孔僅爲大農令。在元鼎二年。尙無大司農之名也。史記平準書無司

字桑羊稱大農丞。不云中丞得之。

郊祀志上

後四年秦宣公作密畤于渭南。史記作六年誤。

設射不來不來者諸侯之不來朝者也。史記云設射狸首。狸首者諸侯之不來者。按禮記射義諸侯以狸首爲節。狸首者樂會時也。大射儀奏狸首。鄭康成云狸之言不來也。其詩有射諸侯首不朝者之言。因以名篇。考工記祭侯之辭曰毋或若女不寧。侯不屬於王所。故抗而射女。不屬者不來朝會也。葺宏所行。乃是古禮。戰國後禮廢。乃疑其神怪爾。

四曰陰主祠三山。師古曰三山卽下所謂三神山。按小司馬引顧氏說東萊曲成有參山卽此三山者是也。師古注誤。

冬塞禱祠。塞古賽字。史記作賽。說文無賽字。當依班志下竝同。

至中山晏溫。如淳曰三輔謂日出清濟爲晏。說文晏天清也。濟與霽同。洪範曰雨曰霽。史記作濟。皆嘗鷓亨上帝鬼神。師古曰鷓亨一也。韓詩采蘋曰于以鷓之。唯錡及釜。亨音普庚反。鷓湘聲相近。亨讀如享。服虔云以享祀上帝也。師古讀如烹。非。

受此書申公。下云申公齊人。則非魯之申培公。蓋別是一人。

郊祀志下

十二年。迺下詔曰。元康四年。宣帝卽位之十二年也。

又祠太室山於卽墨。地理志。膠東卽墨縣有天室山祠。此云太室。疑誤。

三戶山於下密。地理志。下密縣有三石山祠。波古閣本作台水經注引地理志亦作石。

又祠參山八神於曲成。地理志作曲成。參山卽三山八神之一。

蓬山石社石鼓於臨朐。注。地理志。蓬山作達山。按。地理志。臨朐縣有蓬山祠。注誤。蓬爲達。

皆罷候神。候神二字當屬下句。謂候神之方士使者副佐也。

天文志

東井西曲星日戊。戊古鉞字。史記作鉞。俗本譌爲戊。

三星若合。是謂驚立絕行。立古位字。下文作驚位可證。

積薪在北戌西北。積水在北戌東北。戌當作戊。

元封中。星孛於河戌。占曰。南戌爲越門。北戌爲胡門。按。天官書。朝鮮之拔星。弗於河戒。小司馬引天文

志。元封之中。星孛於河戒。其占曰。南戒爲越門。北戒爲胡門。是戌爲戒之譌也。唐一行言。天下山河之象。存乎兩戒。亦引星傳北戒爲胡門。南戒爲越門之文。

五行志上

次二曰羞用五事。注：羞，進也。按：古文敬作蓄，與羞相似，羞疑敬之譌也。又考：藝文志引書云：初一日五行。次二曰羞用五事。言進用五事以順五行也。五行藝文二志皆取劉歆之說，則歆所傳尚書本是羞字。孔光對曰：蝕事亦引書羞用五事。

劉向治穀梁春秋，數其禍福，傳以洪範。注：以洪範義傳而說之。傳字或作傅。讀曰附。予謂或說是也。傳載眚、孟、夏侯勝、京房、谷永、李尋之徒所陳行事。傳亦當爲傅。讀曰附。言以仲舒向歆爲主，而附載眚

孟諸人說也。

建元六年六月丁酉，遼東高廟災。武帝紀作二月乙未。

建始元年正月乙丑，皇考廟災。成帝紀：皇曾祖悼考廟災。此有脫文。

五行志中之上

思曰容。應劭曰：容，通也。古文作容。按：伏生傳本作容。董生春秋繁露述五行五事云：思曰容。容者，言無不容。又云：容作聖。聖者，設也。王者心寬大無大容，則聖能施設，事各得其宜也。此志說思心之不容云：容，寬也。孔子曰：居上不寬，吾何以觀之哉。言上不寬大，包容臣下，則不能居聖位，則爲包容之容。非容智字明矣。容與恭從聰爲韻。鄭氏破容爲容，於義爲短。今漢書刊本作容，非容非容，亦失班志之舊。

霧恆風若。霧蒙聲相近。

史記成公十六年公會諸侯於周。注此志凡稱史記者皆謂司馬遷所撰也。按此條引單襄公見晉厲公視遠步高事見國語而太史公書無之。此外所引史記如單襄公見晉三郤齊國佐一條晉惠公時童謠一條穀洛水鬪將毀王宮一條周三川震伯陽甫言周將亡一條夏后氏之衰二龍止於夏廷一條季桓子穿井得土缶一條隼集陳廷楛矢貫之石磬一條皆國語之文惟夏后二龍伯陽甫事見周本紀土缶楛矢事見孔子世家餘皆無之又戰國及秦事志稱史記者閒與太史公書合而秦昭王三十四年渭水赤始皇二十六年有大人長五丈見於臨洮二世元年天無雲而雷今史記亦無之則班志所云史記非專指太史公書矣古者列國之史俱稱史記周本紀云太史伯陽讀史記陳杞世家云孔子讀史記而漢書藝文志稱仲尼以魯周公之國史官有法故與左邱明觀其史記據行事仍人道因興以立功就敗以成罰有所褒諱貶損不可盡見口授弟子邱明恐弟子各安其意以失其真故論本事而作傳明夫子不以空言說經也然則邱明所論次者謂之春秋傳國語乃左氏所錄史記舊文故亦可稱史記劉知幾以班志所引不云國語惟稱史記警其忘本狗末逐近棄遠蓋未識此旨也史遷著書未嘗以史記名之卽孟堅亦未嘗以史記目太史公書小顏考之未詳爾

能者養之以福注之往也能養生者則定禮義威儀自致於福按律厯志引此文作養以之福師古訓

之爲往之福與取禍相對。此志亦當。然後人據今本左傳改之。與注意不合。

匪傲匪傲。詩作彼交匪敖。春秋傳作匪交匪敖。古書彼與匪通。詩彼交匪紆。荀子勸學篇作匪交匪紆。

左傳引詩如匪行邁謀。杜預云。匪。彼也。

雷以二月出。其卦曰豫。以八月入。其卦曰歸妹。按孟喜卦氣圖。豫二月卦。歸妹八月卦。

遠哉搖搖。春秋傳作遙遙。說文無遙字。當从漢志。

五行志中之下

劉向以爲殷道既衰。高宗承敝而起。盡涼陰之哀。天下應之。既獲顯榮。怠於政事。國將危亡。故桑穀之異。見注。桑穀自太戊時生。涼陰乃高宗之事。而此云桑穀卽高宗時出。其說與尙書大傳不同。或者伏生差謬。此自劉向差謬。非伏生誤也。郊祀志亦以桑穀爲太戊事。

五行志下之上

於易巽爲風爲木。卦在三月四月。易乾鑿度巽位在四月。又云。巽漸三月。蓋立夏巽始用事。在三月四月之間。

秦孝文王五年。旃胸衍有獻五足牛者。此事不見太史公書。孝文王享國一年。無五年也。先是文惠王始都咸陽。史記。惠文王十三年。始都咸陽。卽惠王也。此作文惠誤。

賀欲出光祿大夫夏侯勝當車諫。按此事又見勝傳。

是時吳王濞封有四郡五十餘城。按高帝紀六年以故東陽郡鄆郡吳郡五十三城立劉賈爲荆王。吳濞所封卽賈故地。故傳云王三郡五十三城而伍被傳云吳王王四郡之衆。此志亦云四郡者。楚漢之際會稽嘗析爲吳郡。灌嬰傳度江破吳郡。長吳下得吳守。遂定吳豫章會稽郡。此有會稽。又有吳郡之證。吳王濞傳上患吳會稽輕悍亦兩郡兼舉也。吳郡本會稽所分。言吳可以包會稽。高帝紀單稱吳郡則爲三郡。此兼舉吳會故言四郡也。

五行志下之下

谷永以爲歲首正月朔日是爲三朝。按漢初以十月建亥爲歲首。正月非歲首也。朔而月見東方謂之仄隱。周禮疏引尙書五行傳作側匿。

地理志上

又北播爲九河同爲逆河。逆當作迎。迎逆聲相近。義亦不異。宋子京改迎爲逆。於義雖通。終失班氏之舊。

川曰虜池嘔夷。注嘔夷出平舒。按師古之注本於鄭氏周禮注。蓋以邠夷當嘔夷也。然孟堅實以滄水爲嘔夷。故於代郡靈邱縣云滄河東至文安入大河并州川。而於平舒之邠夷水不云并州川。是班與

鄭異也。顏注雖宗後鄭，卻失孟堅之旨。

京兆尹。南陵霸水亦出藍田谷，北入渭。師古曰：茲水秦穆公更名，以章霸功。視子孫。按：此皆班氏本文。謂霸水本名茲水，秦穆公始更名耳，非師古注也。師字後人妄加。

沂音先歷反。視讀曰示。此上當有師古曰三字。

恆農郡。按：京兆馮翊扶風不言屬司隸者，尊京輔也。恆農河東承三輔之下，故亦不言所屬。河內河南則中隔太原上黨兩郡，故書屬司隸以別之。

武帝元鼎四年置。元鼎以前屬何郡，志失書。

河東郡。莽曰兆陽。兆陽當作兆隊。王莽傳：河東河內恆農河南潁川南陽爲六隊郡。以志考之，南陽爲前隊，河內爲後隊，潁川爲左隊，恆農爲右隊，河東爲兆隊，祈隊則治河南之滎陽。莽傳云：祈隊故滎陽也。

上黨郡。襄相。續志作襄垣。宋子京云：邵本作垣者，是也。

河南郡。雒陽戶五萬二千八百三十九。按：縣邑有戶口數者，京兆之長安、馮翊之長陵、扶風之茂陵、河南之雒陽、潁川之陽翟、僑陵、南陽之宛、蜀郡之成都、魯國之魯、楚國之彭城，凡十縣，惟雒陽注於郡名之下。

中牟趙獻侯自耿徙此。臣瓚音義引春秋傳汲郡古文證此中牟非趙地。春秋正義史記集解皆載其說。師古以其與班氏異故不取。予謂魏晉諸儒地理之學極精。小顏黨同妒真。多所芟棄。如此類者。深可惜也。

陳留郡。武帝元狩元年置。按陳留故梁地。景帝分置濟川國。都濟陽。國除爲郡。武帝始更名。

南陽郡。鄼侯國。注卽蕭何所封。按蕭何初封本是沛郡之鄼。其後嗣乃封南陽之鄼。師古於此殊未了了。

平氏。禹貢桐柏大復山在東南。淮水所在。按五嶽四瀆之祠皆載於志。平氏有淮水祠。獨失書。恐傳寫有脫漏。

南郡。秦置。高帝元年更爲臨江郡。五年復故。按高帝元年楚柱國共敖爲臨江王。都江陵。卽南郡故地也。本項羽所封。史家繫之高帝耳。其五年敖子尉爲漢所虜。則復爲南郡矣。

江夏郡。鍾武侯國。王子侯表有鍾武侯度。此卽度所封也。志有兩鍾武縣。一屬零陵郡。一屬江夏郡。度爲長沙頃王之子。其初封必在零陵之鍾武。而志以江夏之鍾武爲侯國。蓋後來徙封。如春陵侯本

在冷道。後移於南陽也。

九江郡。曲陽。應劭曰在淮曲之陽。按東海郡曲陽縣注亦引應劭曰在淮曲之陽。二注當有一誤。續

漢志以此爲西曲陽

山陽郡。郟成侯國。表未見封郟成者。宋子京云。郟當作邛。外戚侯表。邛成屬濟陰。濟陰與山陽相距不遠。疑子京說是也。

沛郡。敬邱侯國。按王子侯表。魯共王子政封瑕邱侯。疑卽此敬邱也。山陽郡有瑕邱縣。然不云侯國。

魏郡。卽裴侯國。王子侯表作擗裴。

邯溝侯國。王子侯表作邯靑。

常山郡。高帝置。按項羽封張耳爲常山王。都襄國。是常山之名。不始於高帝。蓋趙歇旣滅。遂因爲郡。

耳。高帝紀稱常山二十五城。志止十八縣。蓋後來稍分析之。襄國本王都所在。而志隸趙國。亦一證也。

中邱逢山。長谷諸水所出。東至張邑入濁。諸當依說文作渚。濁當依說文作澗。濁或作蜀亦誤

南行唐牛飲山白陸谷。滋水所出。說文作白陸谷。

清河郡。清陽王都。按漢志稱王都者。惟清河之清陽。信都之信都。若泰山之盧。則云濟北王都。江夏

之邾。則云衡山王吳芮都。以郡與國不同名也。廣陵之廣陵。則云江都。易王非。廣陵厲王胥皆都此。此

外無言王都者。淮南王安都壽春。則朱贛言風俗及之。

涿郡。南深澤。按中山有深澤縣。故云南以別之。李吉甫元和郡縣志。定州深澤縣。本漢南深澤縣。以

涿郡有深澤縣。故此加南以別之。然則中山之深澤有南字。涿郡之深澤無南字矣。與今本互異。以里望準之。中山實在涿郡之南。然續漢志於安平國之南深澤亦云。故屬涿。似今本元不誤。

平原郡。平昌侯國。續漢志謂之西平昌。以琅邪郡亦有平昌縣也。

千乘郡。溼沃。溼當作濕。音它合反。

博昌。博水東北至鉅定。入馬車瀆。幽州寢。博水當作時水。職方氏幽州其浸菑時是也。或作縣水。亦誤。

濟南郡。朝陽侯國。續志謂之東朝陽。以南陽郡亦有朝陽縣也。

獠侯國。蘇林音爻。蔡蕃音由。爻由聲相近。

泰山郡。博有泰山廟。岱山在西北求山上。求山上三字蓋兗州山之譌。

齊郡。鉅定。水經注作巨淀。定有澱音。語之轉也。後人又加水旁。

廣爲山濁水所出。說文爲作媯。

琅邪郡。朱虛東泰山。汶水所出。東至安邱入維。注前言汶水出萊蕪入濟。今此又言出朱虛入維。將桑

欽所說有異。或者有二汶水乎。按水經有二汶水。一出泰山萊蕪縣原山。一出朱虛縣泰山。源流各

異。師古似未見水經。故云然。

靈門有高屨山。注屨卽柘字也。或云屨乃原之譌。

柜根艾水東入海。以水經注考之。卽拒艾水也。根乃拒之譌。柜字水經注俱从手旁。

東海郡。海曲。曲當作西。續志。廣陵郡海西縣故屬東海。沈約宋志。臨淮郡海西縣前漢屬東海。後漢

晉屬廣陵是也。三國志糜竺傳。先主轉軍廣陵海西。

蘭祺侯國。王子侯表作蘭旗。

都陽侯國。應劭曰。春秋齊人遷陽是。按。城陽國陽都縣注。亦引應劭曰。齊人遷陽。故陽國是。二注似有

一誤。然都陽侯音本城陽戴王之子。或當日卽割陽都之鄉爲侯國。本非兩地乎。

臨淮郡。諸郡國皆書屬某州。惟臨淮。武都。隴西。金城。天水。武威。張掖。酒泉。敦煌。安定。北地。九真。河閒。廣

陽。留川。膠東。高密。泗水。六安。失書。按。臨淮。泗水當屬徐州。留川。膠東。高密當屬青州。河閒。廣陽當屬冀

州。北地當屬朔方。六安當屬揚州。九真當屬交州。武都以下九郡當屬涼州。

武帝元狩六年置。晉志。漢武帝分沛東陽置臨淮郡。東陽。楚漢之際所置郡也。漢初屬吳國。

取慮。注。取音趨。又音秋。慮音廬。左傳釋文引如淳說。取音陬。訾之陬。慮音邾婁之婁。

丹陽郡。故鄣郡。屬江都。劉原父謂秦三十六郡無鄣郡。疑鄣非郡名。武帝以故鄣地爲丹陽郡。志但

當云故鄣。屬江都。以是譏班氏之誤。此真瞽說也。志云故梁。故淮南。故齊。故楚。皆謂諸侯王國。鄣非國

名。何以得稱故鄣乎。秦無鄣郡。而楚漢之際則有之。高帝紀以故東陽郡。鄣郡。吳郡五十三縣立荊王。

是高王之世有鄆郡矣。若縣名有故鄆，此猶河南之故市、涿郡之故安，當時或別有取義，豈可援以爲鄆非郡之證。借如劉說，但當云故屬江都，何必又云故鄆，而下文更名丹陽之語，更不可通矣。

胡孰。宋祁曰：胡當作姑。按：胡孰，續志作湖熟，今上元縣東南五十里有湖熟鎮，卽漢故縣所在。自漢至晉，有湖熟縣，無姑孰縣。宋說非是。

黟。漸江水出南蠻夷中。宋祁曰：漸字當作浙字。水經本作漸江水，子京亦失考。

零陵郡。武帝元鼎六年置。當云故屬長沙。

廣漢郡。什方。表作汁防。史記表作汁邠。

葭明。應劭曰：音家盲。古音明如盲。

蜀郡。汶江。澱水出徼外南，至南安東入江。按：說文：澱水出蜀汶江徼外東南入江。从水，我聲。別無澱

字。水經注：澱水出徼外，逕汶江道南，至南安入大渡水。大渡水又東入江，亦從我，不从哉。志作澱者，傳寫之譌。然廣韻十六哈部有澱字，注云：水名，出蜀，則沿譌實始於唐矣。

越巂郡。闌。續志作闌，當从之。若本文是闌，注不應又音闌也。

牂柯郡。同竝。應劭曰：竝音伴。竝伴聲相近。

金城郡。縣十三。按昭帝紀始元六年以邊塞闊遠取天水隴西張掖各二縣置金城郡是金城始置。

止有六縣。此十三縣之中惟破羌允街兩縣宣帝所置其餘俱不書置自何時可見志之闕漏者多也。

天水郡。武帝元鼎三年置。蓋析隴西置李廣隴西成紀人志屬天水是其證也。

武威郡。故匈奴休屠王地。武帝太初四年開。紀在元狩二年當從紀。

張掖郡。故匈奴昆邪王地。武帝太初元年開。按武帝紀元鼎六年分武威酒泉郡置張掖敦煌郡。敦

煌爲酒泉所分則張掖必武威所分矣。四郡之地雖皆武帝所開然先有武威酒泉而後有張掖敦煌。

以內外之詞言之。武威酒泉當云元狩二年開。張掖敦煌當云元鼎六年分某郡置。不必云開也。昆邪

來降。在元狩間而志以爲太初。張掖乃武威所分而志以張掖屬元年。武威屬四年。皆誤。

酒泉郡。武帝太初元年開。紀在元狩二年。

敦煌郡。武帝後元年分酒泉置。紀在元鼎六年。

效穀。師古曰。本魚澤障也。桑欽說。孝武元封六年濟南崔不意爲魚澤尉。教力田以勤效得穀。因立爲縣

名。此班氏本文非小顏注也。桑欽書唐初已失傳。師古曰三字衍。

安定郡。武帝元鼎三年置。蓋析北地置。

上郡。膚施有五龍山。帝原水。黃帝祠四所。按郊祀志。宣帝立五龍山僊人祠。及黃帝、天神帝、原水、凡

四祠於膚施。五龍山一也。帝卽天神帝。二也。原水三也。黃帝四也。

朔方郡屬并州。按武帝元封五年置十三部刺史。并與朔方各自爲部。未嘗屬并州也。朔方之屬并

乃光武建武十一年事耳。上郡亦屬朔方部。故馮野王爲上郡太守。朔方刺史蕭育奏封事薦之。

雲中郡北興。注闕駟曰。廣陵有興。故此加北。按興縣屬臨淮。後漢始屬廣陵。

代郡班氏。秦地圖書班氏。此注疑有脫譌。秦地圖蓋卽蕭何所收者。琅邪郡長廣縣奚養澤在西。秦

地圖曰劇清地。史引秦地圖。祇此二條。

豨氏。孟康曰。豨音權。氏音精。示有祁音。氏有支音。祁與權。支與精聲皆相近。

漁陽郡白檀。洳水出北蠻夷。注洳音呼。鴈反。按水經注。濡水流逕漁陽白檀縣故城。地理志曰。濡水

出縣北蠻中。蓋酈元所見之漢書。本作濡水。不知何時譌濡爲洳。師古不能正也。漢之白檀縣在今古

北口外。灤水所經。濡灤古今字。別無洳水之名。

趙國襄國。西山渠水所出。東北至任入寢。又有蓼水。馮水。皆東至朝平入洩。按說文。洩水出趙國襄

國之西山。東北入寢。此渠水當是洩水之譌。說文又云。灑水出趙國襄國東入洩。此馮水恐亦灑水之

譌也。

廣平國。武帝征和二年置。爲平干國。宣帝五鳳二年復故。按王溫舒爲廣平都尉。在元朔元狩之間。

是平干國未置之前，已爲廣平郡矣。五鳳二年，平干繆王坐殺謁者，會薨，不得代。國除，仍爲廣平郡。故云復故也。當云故廣平郡某年置，乃與復故之文相應。哀帝建平三年，更置廣平國。志又失書，皆脫漏之甚者。

河閒國。故趙。按：河閒與真定、信都、廣平皆故趙地。常山、中山雖爲郡，仍屬趙也。志或書或不書。

留川國。劇。按：北海郡亦有劇縣。志稱留川後并北海，則二劇疑卽一地。然北海之劇本是侯國，卽留

川懿王子錯所封。蓋析劇縣之鄉爲侯國，別屬北海，而劇縣之隸留川如故，非重出也。

東平國。故梁國。當云故梁，無國字。

廣陵國。高帝六年屬荊州。州字衍。高帝六年封劉賈爲荊王，兼有廣陵之地，故云屬荊。其時未設諸

州刺史，不得言荊州也。

本秦京師爲內史，分天下作三十六郡。今以志考之，則三十六郡者：三川、河東、南陽、南郡、九江、會稽、潁

川、碭、泗水、薛、東郡、琅邪、齊、上谷、漁陽、右北平、遼東、遼西、代、鉅鹿、邯鄲、上黨、太原、雲中、九原、鴈門、上郡、隴

西北地、漢中、巴蜀、長沙、南海、桂林、象郡也。裴駟注史記以鄣、黔中與內史足三十六郡之數，而不數南

海三郡，與漢志不合。

高祖增二十六。謂河內、汝南、江夏、豫章、常山、中山、清河、魏郡、涿郡、勃海、平原、千乘、泰山、東萊、東海、廣漢、

定襄、桂陽、武陵、鄆郡、城陽、濟南、楚國、燕國、淮陽國、并內史也。晉志以鄆郡爲秦置。此志但云故鄆郡。不云秦郡。蓋楚漢之際所置也。孝惠時。齊王獻城陽郡爲魯元公主湯沐邑。高后割齊之濟南郡爲呂王奉邑。知此二郡當置於高帝矣。

文景各六。文帝六。謂河閒、菑川、膠東、膠東、廬江、衡山。景帝六。謂北海、濟東、即東平山陽、濟陰、江都、廣川也。文帝建國九。濟南、城陽、因舊郡。濟川、卽泰山郡。景帝建國九。中山、常山、清河、因舊郡。濟川、國後廢。故皆不數。

武帝二十八。謂馮翊、扶風、恆農、陳畱、臨淮、零陵、天水、安定、西河、朔方、武都、武威、張掖、酒泉、敦煌、犍爲、牂柯、越巂、益州、元菟、樂浪、蒼梧、交阯、合浦、九真、廣平、真定、泗水也。南海、鬱林、日南、卽秦南海三郡。沈黎、文山、珠厓、儋耳、臨屯、真番、蒼海後皆廢。故不數。

昭帝一。金城也。

侯國二百四十一。今數之。止百九十有四。蓋史有闕文。

自井十度至柳三度。謂之鶉首之次。十二次宿度。惟載鶉首、鶉火、壽星、析木。飯皆闕如。蓋班氏未定之

本。其述分壘。旣以東平、須昌、壽張爲宋分。又云東平、須昌、壽張皆在濟東。屬魯。非宋地也。當考。亦疑而未決之詞也。所述星度。與蔡邕月令章句合。較之律曆志。每次大率差五六度。

汝南之召陵、潁、彊、新汲、西華、長平、河南之開封、中牟、陽武、酸棗、卷。以志考之，新汲屬潁川，非汝南酸棗屬。陳畱，非河南。蓋漢時郡國屬縣，更易靡常，史家不能考而悉書之。

自東井六度至亢六度，謂之壽星之次。東井當作軫。

南至浮水、繁陽、內黃、斥邱。志未見浮水縣，繁陽以下屬魏郡。

南得涿郡之易容城、范陽、北新城。按中山國有北新城，不屬涿郡。成城字亦異。

自危四度至斗六度，謂之析木之次。危當作尾。

子之營兮，遭我虜囷之閒兮。古書營與環通。說文：營，市居也。讀如闌闌之闌，還與環音亦同也。猛農聲

相近，故文或爲囷。

東平、須昌、壽張。壽張本名壽良，光武避趙王良諱，改良爲張。此班氏追改。

溝洫志

山行則楸。史記：山行卽橋，橋與楸則與卽皆聲相近也。

武安侯田蚡爲丞相，其奉邑食郿。郿與兪同。清河郡之縣也。兪侯欒布子賁，以景帝中六年嗣侯。元狩

六年，坐爲太常犧牲不如令，國除。當武安爲相時，賁尙無恙，而奉邑得食郿者，布封邑僅千八百戶，除

所封之外，仍屬之有司也。

藝文志

記百三十一篇。七十子後學者所記也。按鄭康成六藝論云。戴德傳記八十五篇。戴聖傳記四十九篇。此云百三十一篇者。合大小戴所傳而言。小戴記四十九篇。曲禮。檀弓。雜記。皆以簡策重多。分爲上下。實止四十六篇。合大戴之八十五篇。正協百卅一之數。隋志謂月令。明堂位。樂記三篇。爲馬融所足。蓋以明堂陰陽三十三篇。樂記二十三篇。別見藝文志。故疑爲東漢人附益。不知劉向別錄已有四十九篇矣。月令三篇。小戴入之禮記。而明堂陰陽與樂記仍各自爲書。亦猶三年問出於荀子中庸。緇衣出於子思子。其本書無妨單行也。記本七十子之徒所作。後人通儒各有損益。河閒獻王得之。大小戴各傳其學。鄭氏六藝論言之當矣。謂大戴刪古禮二百四篇。爲八十五篇。小戴又刪爲四十九篇。其說始於晉司空長史陳邵。而陸德明引之。隋志又附益之。然漢書無其事。不足信也。或謂漢書不及禮記。考河閒獻王所得書。禮記居其一。而郊祀志引禮記。燔柴於太壇。祭天也。瘞葬於太折。祭地也。又引禮記。天子祭天地及山川。歲徧。又引禮記。天子籍田千畝。以事天墜。又引禮記。祀典。即祭法也。律麻志謂之祭典。功施於民。則祀之。天文。日月星辰。所昭仰也。地理。山川海澤。所生殖也。又引禮記。唯祭宗廟社稷。爲越紼而行事。梅福傳引禮記。孔子曰。某般人也。韋玄成傳亦引禮記。王制禮記祀典之文。皆在四十九篇之內。志不別出。記四十九篇者。統於百三十一篇也。

春秋古經十二篇。謂左氏經也。劉歆傳。歆校祕書。見古文春秋左氏傳。又云。左氏傳多古字古言。許慎

五經異義言。今春秋公羊說。古春秋左氏說。

合於堯之克攘。注。攘古讓字。按說文。揖攘字从手。責讓字从言。數奪字从支。

易之謙謙。一謙而四益。注。謙字與謙同。古書言旁字與口旁字往往相通。故謙或爲謙。

五子胥八篇。五古伍字。呂氏春秋。五員亡荆。古今人表。伍參亦作五參。非文之譌。陳涉傳。鉉人五逢。史

記作伍徐。

凡數術百九十家。十字衍。

廿二史考異卷八

漢書二

陳勝傳

陳勝字涉。陽城人。師古曰。地理志。屬汝南郡。按。汝南。潁川皆有陽城縣。汝南之陽城爲侯國。宣帝時始置。此當是潁川之陽城也。

項籍傳

梁使羽與沛公別攻城陽。城陽當作成陽。

諸別將皆屬。號卿子冠軍。皆屬下當有義字。

瑕邱公申陽者。孟康曰。瑕邱縣之老人也。姓申。名陽。予謂此公非老人之稱。春秋之世。楚縣令皆僭稱公。楚漢之際。官名多沿楚制。故漢王起沛。稱沛公。楚有蕭公。薛公。酈公。栢公。漢有滕公。咸公。皆縣令之稱。此瑕邱公亦是瑕邱縣令。孟說非也。

張耳傳

東井者。秦分也。先至必亡。亡字疑誤。

貫高等乃壁人柏人。要之置廁。文穎曰：置人廁壁中，以伺高祖。予謂置者，郵傳之名。廁與側同，非廁溷之廁也。伏人於置側，欲要而殺之。

韓王信傳

成帝時，繼功臣後，封增兄子岑爲龍雒侯，薨。子持弓嗣。按功臣表：元封當作元延元年，節侯共以寶從父昆弟紹封。子敞嗣。蓋增之兄子於寶爲從父昆弟也。惟兩侯之名表傳各異，未詳孰是。

荆燕吳傳

荆王劉賈，宗室王例不書姓。劉賈劉澤獨書姓。衍文。

故擊子悼惠王王齊七十二城。庶弟元王王楚四十城。按高帝紀：封齊王七十三縣。此云七十二，或彼文誤也。楚元王傳及高紀俱云王三十六縣。此云四十城，恐誤。

御史大夫量錯營或天子師。古曰：營謂回繞之也。營與熒通，非回繞之義。

劉向傳

父德。武帝時治淮南獄。按淮南王安以謀反誅。事在元狩元年。此傳言昭帝卽位，德待詔丞相府。年三十餘。自元狩元年數至後元二年昭帝卽位，實三十六年矣。當淮南獄起之時，恐德尙未生，安得預治獄之列。

孝武帝時。兒寬有重罪。繫按道侯韓說諫曰。前吾邱壽王死。陛下至今恨之。今殺寬。後將復大恨矣。上感其言。遂貫寬。復用之。此事寬傳不載。韓說名在佞幸傳。而能爲寬強諫。亦自可取。當表而出之。

下太傅韋玄成。玄成爲太子太傅。不當刪太子字。蓋轉寫失之。

故其詩曰。密勿從事。密勿卽黽勉。聲之轉也。古讀勿如沒。爾雅。羸沒。勉也。亦密勿之異文。

日月鞠凶。鞠告聲相近。

雨雪麋麋。見睨聿消。聿曰聲相近。

易曰。飛龍在天。大人聚也。聚造聲相近。

及秦惠文武昭嚴襄五王。惠文一也。武二也。昭三也。嚴襄卽莊襄四也。此云五王者。蓋昭王之後。尙有

孝文王。傳脫孝文二字耳。

劉歆傳

博見強志。志古識字。後文賢者志其大者。不賢者志其小者。藝文志多見而志之。皆從古文。

田叔傳

趙涇城人也。史記涇城今在中山國。考地理志。中山有苦涇。有陸成。無涇城縣也。

曹參傳

遂取臨淄。還定濟北郡。師古曰：時未有濟北郡。史追書之耳。按：項羽封田安爲濟北王，都博陽。田榮攻殺安，并三齊之地，因以濟北爲郡，非追書也。

擊龍且軍於上假密。文穎曰：或以爲高密。高假聲相近。

參之相齊，齊七十城。按：吳王濞傳，悼惠王王齊七十二城。高五王傳亦云食七十餘城。此云七十者，舉成數也。

哀帝時，乃封參玄孫之孫本始爲平陽侯。按：功臣表本始乃參玄孫之玄孫，傳脫玄字。

張良傳

景駒自立爲楚假王，在陳留。陳字衍。

封雍齒爲什方侯。功臣表作汁防。

陳平傳

陽武戶牖鄉人也。師古曰：陽武，縣名，屬陳留。按：地理志，陽武屬河南，不屬陳留。

嬰封平爲曲逆侯，盡食之。漢時封縣侯，戶數多少不同。如蕭何始封鄼，食八千戶，後又益封二千戶。元

狩中，以鄼戶二千四百封其曾孫慶。宣帝時，以鄼戶二千封其玄孫建世。封號雖同，而租入迥別。蓋一

縣之戶不止此數。除侯所食外，其餘歸之有司也。高祖功臣盡食一縣者，惟平一人。

周勃傳

於是陰謀以爲少帝、及濟川、淮陽、恆山王皆非惠帝子。此稱恆山。後稱常山。史駁文也。考外戚恩澤侯表。高后時以孝惠子侯者四人。襄城侯義。三年爲常山王。宏 更名卽少帝也。軹侯朝。四年爲常山王。壺關侯武。六年爲淮陽王。昌平侯大。七年爲呂王。異姓諸侯王表。高后七年。呂王產徙梁。十一月丁巳。王大始故平昌侯。恩澤侯表 作昌平侯傳稱濟川王。表稱呂王。其實一人也。初高后割齊之濟南郡爲呂王奉邑。及呂產徙封。改呂國曰濟川。以王孝惠之子。此事之所宜有者。則濟川卽濟南矣。孝景時分梁爲濟川國。考梁孝王始封。其時濟南王辟光尙存。七國旣平。梁又未嘗益封。此兩濟川者。名同而實異也。文帝擇勃于賢者。皆推亞夫。迺封爲條侯。師古曰。縣在勃海。地理志作蔣字。其音同耳。按地理志。勃海郡有脩市縣侯國。應劭讀脩爲條。此清河綱王子寅所封也。又信都國有脩縣。師古亦讀爲條。亞夫所封。蓋信都之脩。非勃海之脩市也。志作脩。不作蔣。小顏注誤。

夏侯嬰傳

夏侯嬰沛人也。嬰本夏侯氏。而標目稱滕。不稱夏侯。石奮傳標題不云石。而云萬石。皆因史公元文。然於例終未盡一。

曾孫頗尙平陽公主。坐與父御婢姦自殺。國除。頗尙主。主隨外家姓。號孫公主。故滕公子孫嬰爲孫氏。

按漢景帝女平陽公主。本陽信公主。王皇后生。元帝女平陽公主。衛婕妤生。其外家皆非孫氏。此夏侯頗所尙之平陽公主。蓋別是一人。不知何帝女也。馬端臨帝系考載。高祖一女。魯元公主。文帝二女。館陶長公主。及周勃子勝之所尙公主。景帝三女。平陽公主。南宮公主。隆慮公主。武帝五女。鄂邑蓋長公主。夷安公主。衛長公主。諸邑公主。陽石公主。宣帝二女。館陶公主。敬武公主。元帝三女。平都公主。平陽公主。潁邑公主。皆據班史紀傳。然尙有未備。如博成侯張建。建始四年。坐尙陽邑公主。與婢姦。主旁數醉罵主。免。夏侯頗尙平陽公主。成帝微行。過陽阿。主作樂。此三事皆遺漏。而南宮公主壻彤。申。見功臣表。馬氏亦失書。

灌嬰傳

灌嬰、睢陽販繪者也。依班史例。當云睢陽人也。以販繪爲生。

傅寬傳

傅寬以魏五大夫騎將從。傅寬斬歙二人。史失其所居郡縣。

酈食其傳

陳畱高陽人也。按地理志。陳畱郡無高陽縣。蓋鄉名。非縣名。涿郡琅邪郡皆有高陽縣。然非食其所居

之高陽也。高祖紀。沛公西過高陽。文穎云。聚邑名。屬陳畱圉。按。圉縣漢屬淮陽。後漢始屬陳畱。臣瓚云。陳畱傳在雍邱。

西南。

婁敬傳

婁者劉也。賜姓劉氏。婁劉聲相近。今吳人呼婁江曰劉家河。吾邑婁塘市。土人亦呼劉。

濟北王勃傳

國除爲北安縣。屬泰山郡。按地理志。泰山郡無北安縣。惟盧縣。注云濟北王都。疑北安爲盧之誤。或初名北安。而後改盧也。

息夫躬傳

烏孫兩昆彌弱。卑爰寔強盛。卑爰寔。匈奴傳作卑援寔。

循烏孫就屠之跡。孫字衍。

衛綰傳

代大陵人也。按地理志。大陵縣屬太原。不屬代郡。漢初以山南太原之地屬代國。故繫大陵於代。

直不疑傳

稍遷至中大夫。按公卿表。景帝中六年。中大夫令直不疑。更爲衛尉。此傳脫令字。中大夫令本衛尉也。景帝初改。後復。

周仁傳

以是得幸入臥內。周仁列於佞幸，乃與萬石君直不疑同傳，似非其倫。

張敞傳

景帝時，尊重常爲九卿。至武帝元朔中，代韓安國爲御史大夫。按公卿表，敞代安國爲御史大夫。在元光四年，非元朔也。任御史大夫五年，以老病請退，則在元朔中耳。表於景帝五年，書安邱侯張敞爲奉常。據傳，敞爲安邱侯，說少子未嘗嗣侯，此表之誤也。又表於景帝元年，有廷尉敞，不書姓，疑亦張敞也。

文三王傳

地北界泰山，西至高陽。蘇林曰：陳畱北一作比縣。高陽非縣名，文穎以爲聚邑名者得之。

與睢陽太守客俱出同車。按睢陽非郡名，不得有太守。當作淮陽。因上有睢陽字，相涉而誤耳。史記本作淮陽。淮陽國，景帝四年除爲郡，故得置太守。梁與淮陽接壤，故太守客得至梁境，爲睢陽人所殺也。

賈誼傳

夫樹國固必相疑之執。沈彤曰：夫當作大。鄭氏云：今建立國，秦大其執，必固相疑也。若作夫樹國云云，則當請廢封建矣。或於固字句絕，則當請無立國於險矣。而下文皆不之及，但言國不可太大，宜衆建諸侯而少其力，故知夫爲大之譌。

諸侯之地其削頗入漢者爲徙其侯國及封其子孫也所以數償之沈彤曰也當作他謂諸侯或以罪黜其地被削多入於漢者若因其所存地爲國則國小而其子孫亦不得封故爲之徙其侯國并封其子孫於他所如其被削之數償之也師古注誤

病非徒瘡也又苦蹶齧師古曰蹶古蹶字音之石反足下曰蹶今所呼腳掌是也按說文無蹶字小顏讀爲蹶恐亦臆說當是啣字之譌說文啣脛肉一曰曲脛讀若遠渠道切齧亦當從說文作齧齧頰戾也啣齧謂足脛反戾不便行動

量錯傳

丞相青翟中尉嘉廷尉馮劾奏錯是時開封侯陶青爲丞相翟字衍文也因武帝時有丞相嚴青翟相涉而誤景帝紀元年遣御史大夫青翟誤與此同

枚乘傳

凡可讀者不二十篇不當作百藝文志枚皋賦百二十篇

路溫舒傳

鉅鹿東里人也地理志鉅鹿郡無東里縣

韓安國傳

梁城安人也。按地理志成安縣屬陳留郡。陳留本梁地。武帝始置爲郡。故史繫之梁耳。城當作成。若是則北發月氏可得而臣也。師古曰發猶徵召也。北發北狄地名。師古注誤。詳見武帝紀。

趙敬肅王彭祖傳

大鴻臚禹。王禹也。

中山靖王勝傳

令諸侯以私恩自裂地分其子弟。而漢爲定制封號。輒別屬漢郡。按地理志諸侯王國二十。如趙、真定、

河間、廣陽、城陽、廣陵皆止四縣。菑川、四水止三縣。高密、六安皆五縣。魯六縣。東平、楚皆七縣。竊疑漢初

大封同姓。幾據天下之半。文景以後。稍有裁制。然諸侯王始封。往往兼二三郡之地。其以罪削地者。史

亦不多見。何至封域若此之小。及讀中山王勝傳。謂武帝用主父偃謀。令諸侯以私恩自裂地封其子

弟。而漢爲定制封號。輒別屬漢郡。漢有厚恩。而諸侯地稍自分析。弱小云。始悟諸侯王國所以日削者。

由王子侯國之多。以王子侯表徵之。城陽五十四人。趙三十五人。河間二十三人。菑川二十一人。魯二

十人。王國之食邑。皆入於漢郡。無怪乎封圻之日蹙矣。郡領縣多者。無過於琅邪、東海、琅邪縣五十一

人。東海縣三十八。琅邪與城陽、菑川、膠東、高密四國鄰。東海與魯、泗水、楚、城陽諸國鄰。侯國之析置者。多

屬焉。此所領之所以多於它郡也。中山之陸成。表作陸城新處。表作新處安險皆嘗爲侯國。改屬它郡矣。陸成新處皆屬

涿郡地理志未論十二國 涿郡亦當屬涿郡也。元之世中山絕而復封。所封又是帝子故稍以舊封益之。如北新城劉向以爲

涿郡地理志未論十二國而志屬中山亦是後來益封之證也。

哀帝復立雲客弟廣漢爲廣平王。薨無後。平帝元始二年復立廣川惠王曾孫倫爲廣德王。奉靖王後。羅願曰。按諸侯王表。廣漢至王莽時猶在。安得遽云薨無後。此廣德王倫自以廣川系絕故封。考之廣川惠王傳可見。非續中山也。中山子孫侯者二十餘人。不應取於見絕之廣川明矣。大昕按。劉敞以此倫封廣德王。廣川王後又封廣德王。俱是平帝二年事。必有一誤。今據羅氏辨正。則此傳薨無後以下二十三字。明是衍文。倫瘞字形相近。非有二人也。

李廣傳

隴西成紀人也。按地理志成紀縣屬天水。不屬隴西。天水郡武帝所置。漢初蓋屬隴西也。

典屬國公孫昆邪。卽平曲侯公孫渾邪。丞相賀之大父也。

將軍其率師東轅。彌節白檀。孟康曰。白檀縣名。屬右北平。按地理志。白檀屬漁陽。不屬右北平。孟注因下有右北平字而誤耳。

衛青霍去病傳

路博德。西河平州人。地理志。西河郡有平周。無平州。

董仲舒傳

先是遼東高廟長陵高園殿災。仲舒居家推說其意。上彙未上。主父偃侯仲舒私見嫉之。按主父偃傳。元光元年西入關。而高廟高園殿災。乃在建元六年。其明年始改元元光。計其年月似不相應。

公孫弘傳

其以高成之平津鄉戶六百五十封丞相弘爲平津侯。恩澤侯表云三百七十三戶。高成屬勃海郡。表作高城。

好問近乎知。此禮記中庸文。今本作好學。

兒寬傳

居位九歲以官卒。表稱爲御史大夫八年卒。

張湯傳

勅鼠掠治傳爰書。傳當作傳。傳音附。謂附於爰書也。師古訓爲傳逮。似非。

王朝齊人以術至右內史。公卿表作王量。量與朝同。司馬遷傳爰盎朝錯列傳第四十一。卽量錯也。

張安世傳

子勃嗣。表作敞。古書勃爲敦。敦與敞字形相涉。因譌爲敞耳。

杜業傳

業有材能。業字君都。見公卿表。

鉅鹿太守孫宏。翟方進傳作孫閔。

司馬遷傳

昔在顓頊。劉知幾謂篇首當云司馬遷字子長。馮翊夏陽人。繼以其自序曰云云。方合著述之體。其說固然。然此例人所共知。孟堅命世大才。詎猶未了。蓋叔皮父子踵史遷而作書。故自敍一篇。悉因舊文。附以後事。取述而不作之義。意主撝謙。非失於檢照也。

燕刺王旦傳

其者寡人之不及與。其者之者。讀如諸。

廣陵王胥傳

宣帝卽位。封胥四子。聖曾寶昌皆爲列侯。下文云胥子南利侯寶。坐殺人奪爵。卽四侯之一也。予弟晦之曰。考王子侯表。旦有朝陽荒侯聖。平曲節侯曾。南利侯昌三人。別無名寶者。表稱南利侯昌。地節二年。坐賊殺人免。此傳云南利侯寶。疑誤。

武五子傳贊

建元六年。蚩尤之旗。其長竟天。後遂命將出征。略取河南。建置朔方。其春。戾太子生。按本傳。戾太子。元狩元年立爲皇太子。年七歲矣。初。上年二十九。乃得太子。甚喜。以年歲推之。戾太子生於元朔元年。非建元六年也。衛青傳。元朔元年春。衛夫人有男。外戚傳。孝武衛皇后。元朔元年生男。據遂立爲皇后。立七年。而男立爲太子。皆與本傳合。孟堅贊語。似未推校年歲。若衛青收河南。置朔方郡。則在元朔二年。又在戾太子生之後矣。

嚴助傳

而中國之人。不能其水土也。師告曰。能堪也。能耐二字。古書多通用。食貨志。能風與旱。鼂錯傳。其性能寒。其性能暑。趙充國傳。漢馬不能冬。西域傳。不能饑渴。師古皆讀如耐。此亦當從耐音。

朱買臣傳

會邑子嚴助貴幸。邑子猶言邑人。助與買臣皆吳人。同邑。故有邑子之稱。疏廣傳。公卿大夫。故人邑子。設祖道。供張東都門外。趙廣漢傳。廣漢疑其邑子榮畜教令。師古曰。蘇賢同邑之子也。尹翁歸傳。定國家在東海。欲屬託邑子二人。師古曰。邑子同邑人之子也。皆與此同義。六朝碑多有題邑子者。

吾邱壽王傳

吾邱壽王。兩都賦序作虞邱。虞吾聲相近。

東方朔傳

平原厭次人也。師古曰：高祖功臣表有厭次侯爰類，是則厭次之名，其來久矣。而說者乃云後漢始爲縣，於此致疑，斯未通也。按地理志：平原郡有富平侯國，應劭云：明帝更名厭次，後人因疑西京無厭次之名。考厭次侯爰類傳：子至，孝文五年以謀反誅國除，而張安世封富平侯在昭帝時，其封邑本在陳留郡。及子延壽嗣侯，上書讓減戶邑，徙封平原，乃在宣帝之世。然則昭帝以前，平原無富平侯國也。蓋厭次國除之後，本爲厭次縣，宣帝移富平侯國於此，始去厭次之名。明帝時，仍復其舊。水經注謂厭次故名，非始明帝，蓋復故耳。其說精而當矣。漢時列侯國除，有卽爲縣者，如武帝以穰之盧陽鄉宛之臨駝聚封霍去病爲冠軍侯，去病子嬪薨，國除，爲冠軍縣是也。武帝以高成之平津鄉封公孫丞相爲平津侯，元帝以僮之樂安鄉封匡衡爲樂安侯，而地理志無平津樂安縣，是國除之後，仍爲鄉矣。南陽郡有博山侯國，故順陽縣，哀帝以封丞相孔光，改名。明帝改曰順陽，亦是從其舊名，與厭次正相類。是婁數也。師古曰：婁數，戴器也。以盆盛物戴於頭者，則以婁數薦之。釋名：婁數猶局縮，皆小意也。說文：檣盪，責戴器，婁數卽檣盪，聲之轉也。與寄生聲亦相近。故樹上之寄生，亦有婁數之名。廣韻：婁數，四足几也。此與蘇林四股鉤之說相近，皆以形相似名之。

公孫賀傳

語在江充戾園傳。按外戚王夫人傳云。語在戾太子傳。劉屈氂傳云。語在太子傳。上文有戾字。故但稱太子。而此與江充傳俱稱戾園。亦例之不一也。

朱雲傳

成帝時丞相故安昌侯張禹。以帝師位特進。甚尊重。按禹以成帝河平四年爲丞相。鴻嘉元年。以老病乞骸骨。賜安車駟馬。罷就第。以列侯朝朔望。位特進。此稱位特進。則在罷相之後。故朱雲但斥言安昌侯張禹。不言丞相。而成帝亦但以廷辱師傅罪雲也。文當云故丞相安昌侯。今本以故字屬丞相下。乃轉寫之誤耳。

梅福轉

書曰。毋若火始庸庸。今本作燄燄。庸燄聲相近。遂下詔封孔子世爲殷紹嘉公。孔何齊初封殷紹嘉侯。尋進爵爲公。

霍光傳

自先帝時。桀已爲九卿。公卿表。後元二年。太僕上官桀爲左將軍。其初除太僕。表不得其年。蓋征和二年。公孫敬聲有罪下獄。卽以桀代之也。

御史大夫蔡誼。卽蔡義也。儒林傳亦作蔡誼。按鄭仲師注。周禮云。古者書儀。但爲義。卽威儀字。今時所謂義。

爲誼。即仁義字。漢書項籍傳贊仁誼不施。董仲舒傳布德施仁以厚之。設誼立禮以導之。知自貴於物。然後知仁誼。知仁誼然後重禮節。將欲興仁誼之休德。明帝王之法制。正其誼。不謀其利。五尺童子羞稱五伯。爲其先詐力而後仁誼也。夏侯勝傳孝武皇帝躬仁誼。皆以誼爲義。義者宜也。故字从宜。儒林傳東郡太守翟

金日磾傳

宣帝卽位。賞爲太僕。霍氏有事萌芽。上書去妻。按公卿表。宣帝甘露四年。秭侯金賞爲侍中太僕。距霍氏之亡已十六年矣。霍氏有事之始。賞祇爲侍中。未任太僕也。

日磾傳子節侯賞。功臣表失載賞諡。

趙充國傳

至征和五年。按征和無五年。疑有誤。數使使尉黎危須諸國。西域傳作尉犁。

充國乞骸骨。賜安車。駟馬。黃金六十斤。罷就筮。按公卿表於神爵二年。書後將軍充國。不言何年罷免。據此傳似卽是神爵二年事。而常惠傳言甘露中。後將軍充國薨。天子遂以惠爲右將軍。則充國雖以病免。宣帝猶以將軍待之。終充國之身。虛將軍位不置也。

元始中。修功臣後。復封充國會孫伋爲營平侯。恩澤侯表失載此事。

常惠傳

是時烏孫公主上書言匈奴發騎田車師。此傳與西域傳相同者。幾三百言。

諡曰壯武侯。功臣表作壯侯。

陳湯傳

君子以功覆過。而爲之諱行事。按小顏解行事爲滅項之事。是也。劉貢父疑其不辭。欲以行事屬下句。

淺陋可笑。

西域都護段會宗爲烏孫兵所圍。驛騎上書。願發城郭敦煌兵以自救。丞相王商、大將軍王鳳、及百僚議數日不決。按會宗傳。竟寧陽朔中。再爲西域都護。不云爲烏孫所圍。惟元延中嘗被圍。其時又非都護。且不與丞相王商、大將軍王鳳同時。此傳云會宗爲烏孫所圍。似當在陽朔中。又考公卿表。王商於河平四年罷相。以張禹代之。其明年始改元陽朔。使會宗果於陽朔中被圍。則丞相乃張禹。非王商矣。以二傳參互考之。當有一誤。或會宗傳陽朔字當爲河平。或此傳王商當爲張禹也。

段會宗傳

天水上邽人也。按地理志。上邽縣屬隴西。趙充國傳。外戚上官皇后傳亦云隴西上邽人。此作天水。疑

誤。

末振將殺大昆彌。會病死。漢恨誅不加。按西域傳。大昆彌。翎侯難。柄殺末振將。漢恨不自責。誅末振將。復使段會宗。斬其太子番邱。會宗以難。柄殺末振將。雖不指爲漢。合於討賊。奏以爲堅守都尉。是末振將實難。柄所殺。傳以爲病死者。誤也。

小昆彌。烏犂靡者。末振將兄子也。西域傳作安犂靡。烏安聲相近。

兩龔傳

執金吾閻崇。公卿表作閻宗。

鮑宣傳

宣不知情。宋祁曰。情字上疑有其字。按後漢書孔融傳。漢律。與罪人交關三日已上。皆應知情。知情者。應坐罪。不知情者。不坐。故揚雄傳云。雄不知情。有詔勿問。宋子京疑情上當有其字。蓋未考漢律也。

韋賢傳

黼衣朱紱。注。朱紱爲朱裳。畫爲亞文也。亞古弗字。亞當作匹。兩已相背也。與亞次字音義全別。此朱紱諸侯之服。當訓爲鞞。不當作黼黻解。師古注誤。

丙吉傳

豈宜褒顯。豈宜者，猶言宜也。古人語急，以豈不爲不，不可爲可。此當言豈不宜，亦語急而省文耳。朱子文疑當爲直字，非孟堅之旨。

眭孟傳

孝昭元鳳三年正月。眭孟言災異，涉妖妄。蓋夏賀良之流，其事已見五行志，不必別爲立傳。

夏侯勝傳

初魯共王分魯西寧鄉以封子節侯，別屬大河。大河後更名東平，故勝爲東平人。按魯共王子寧陽侯恬、瑕邱侯政，皆諡節侯。此傳所稱節侯，蓋寧陽侯也。地理志寧陽屬泰山郡，不屬東平。蓋宣帝建東平爲王國，復以寧陽屬它郡。

從始昌受尙書及洪範五行傳，說災異。始昌習尙書，名已見儒林傳，其說災異，祇有言柏梁臺災事，附見勝傳可矣。乃以兩夏侯題其篇目何也。

京房傳

房以建昭二年二月朔拜上封事。二月當作三月，以三統術推是年正月甲午朔，二月甲子朔，房封事所稱辛酉者，正月二十八日也。己卯、庚辰、辛巳，則二月之十六、十七、十八日也。張晏注以辛巳蒙氣乘卦爲晉卦，解卦太陽侵色爲大壯。考卦氣圖，晉解大壯皆二月卦，則房上封事必在二月後矣。

迺辛巳蒙氣復乘卦。太陽侵色。張晏曰。晉卦解卦也。太陽侵色。謂大壯也。以三統術推。是年二月二十四日丁亥春分。其前六日辛巳。正當晉卦用事之始。而蒙氣乘之。春分後解卦用事。又六日七分。而大壯乃用事。則三月癸巳朔也。大壯消息卦。晉解皆雜卦。迺丙戌小雨。丁亥蒙氣去。丙戌四月二十四日。其明日丁亥。直小滿。小畜卦用事。亦雜卦也。己丑夜有還風。盡辛卯。己丑四月二十七日。辛卯二十九日。至癸巳。日月相薄。癸巳五月二日。正當乾卦用事之始。而有相薄之異。故云邪陰同力。而太陽爲之疑也。

翼奉傳

注。翼氏風角曰。木落歸本。水流歸末。故木利在亥。水利在辰。利當作形。木刑於亥。水刑於辰。火刑於午。金刑於酉。五行家所謂自刑也。亥爲木之生方。故云本。辰爲水之死方。故云末。

七月己酉地復震。以三統術推。初元二年七月己未朔。無己酉日。恐是乙酉之誤。

蓋聞聖賢在位。云云。按元帝紀。初元二年三月。詔書舉茂材異等。直言極諫之士。文與此略同。其七月。又有詔書。卻無舉直言極諫事。此傳誤合兩詔爲一。因添一年地再動之語。

今年太陰建於甲戌。古法太陰與太歲不同。奉上封事。在初元二年。以今法推之。太歲正在甲戌。蓋以

太歲爲太陰。實自奉始矣。漢初言太歲者。皆用超辰之法。故太初之元歲在丙子。依此下推。初元二年歲當在癸酉。而云甲戌者。以三統歲術計之。太初元年歲星在婺女六度。已是星紀之末。則太歲亦在丙子之末。太歲與歲星每年多行一分。至太始二年。歲星已度壽星而入大火。太歲亦超乙酉而在丙戌矣。故算至初元二年。太歲得在甲戌也。

注。孟康曰。太陰在甲戌。則太歲在子。按。太陰在戌。太歲當在申。孟說非也。

律以庚寅初用事。麻以甲午從春。孟康曰。十一月庚寅日。黃鍾律初起用事也。按。推律自歲前十一月

始。依三統術推。得初元二年。天正癸亥朔。卽初元元年十一月也。冬至與朔同日。庚寅則月之二十八日也。冬至

日黃鍾律始用事。孟云庚寅日黃鍾律初起用事。其法未詳也。又以三統術推。是年二月四日甲午春分。故云麻以甲午從春。

尹翁歸傳

少子岑。歷位九卿。至後將軍。岑字子河。嘗爲執金吾。元延元年爲後將軍。公卿表作右將軍。誤。

韓延壽傳

延壽代蕭望之爲左馮翊。而望之遷御史大夫。按。公卿表。望之之後。尙有左馮翊彊一人。非卽以延壽代也。望之由馮翊遷大鴻臚。又二年。而拜御史大夫。其時延壽亦爲左馮翊矣。傳所書未核。

鄭崇傳

上遂下詔曰。朕幼而孤。皇太后躬自養育。惠澤茂焉。前追號皇太后。父爲崇祖侯。惟念德報未殊。朕甚惡焉。侍中光祿大夫商。皇太后父同產子。其封商爲汝昌侯。按哀帝紀。建平四年二月。封帝太。太后從弟侍中傅商爲汝昌侯。六月。尊帝太后爲皇太后。此詔稱皇太后。史家追改。

蕭望之傳

下少府宋畸問狀。注。畸音居宜反。公卿表作宋疇。字之譌也。宣帝紀有詹事畸。師古曰。宋畸也。亦音居宜反。蓋由詹事歷大鴻臚。左馮翊。遷少府。

蕭育傳

歷冀州青州兩部刺史。育又爲朔方刺史。見馮野王傳本傳失書。

馮奉世傳

其先馮亭。爲韓上黨守。此傳述馮氏先世百有餘言。與司馬遷揚雄自序略相類。疑馮商續太史公書。亦有自序。孟堅仍其元文耳。

送大宛諸國客至伊脩城。西域傳。吏士四十人。田伊循。循脩二字相似。因譌作脩耳。三國志蜀後主傳。費禕爲蜀降人郭循所殺。禕傳亦作郭循。而魏三嗣主傳。張嶷傳竝作郭脩。

東平王宇傳

詩不云乎。毋念爾祖。述脩厥德。述與聿同。爾雅。遙自也。孫炎云。遙古述字。讀聿。

定陶王康傳

追尊共王爲共皇帝。帝字衍文。哀帝紀外戚傳但云共皇。無稱帝之文。丁姬初稱共皇后。後稱帝太后。太后之號。從子不從夫也。漢制。非有天下者。不稱帝。故高帝父太公稱太上皇。而後漢追稱孝德皇。孝崇皇。孝仁皇。皆不稱帝。

匡衡傳

於是司隸校尉王尊劾奏衡。此奏已見尊傳。較此文爲詳。

封樂安侯。食邑六百戶。恩澤侯表作六百四十七戶。此舉其成數耳。

初元元年。郡圖誤以閩伯爲平陵伯。漢時郡國各有圖。至魏猶然。清河平原爭界。八年。嬰二刺史不決。

孫禮請以烈祖初封平原時圖決之是也。

衡遣從史之儻。收取所還田租穀千餘石入衡家。按衡以建昭三年封侯。距初元之元。已十三年。又四

歲。爲成帝建始元年。衡多收租入三歲矣。此租穀千餘石。卽三歲中多收之數。郡初上計簿時還之官。至是乃復收之也。以是推之。列侯封戶雖有定數。要以封界之廣狹。定租入之多寡。不專以戶數爲定。

也。

司隸校尉駿。少府忠行。廷尉事劾奏衡。按公卿表。衡以建始三年十二月免相。而張忠爲少府。在建始四年。不應有劾衡事。衡免相時。廷尉則何壽也。

薛宣傳

壹关相樂。師古曰。关古笑字也。

說文無笑字。徐鉉本增入。

关亦不知所从。當卽芙薊之芙。說文。媠从女。芙聲。

女子笑也。莞爾之莞亦从艸。明芙卽古笑字矣。漢隸从竹从艸之字。皆省作艸。後人往往相亂。如著作字當从竹。而反从艸。笑語字當从艸。而反从竹。皆由隸省而譌也。隸書艸在上者。或變爲兩點一畫。故班史或作关。亦有作咲者。此卽从艸之證。李陽冰謂竹得風。其體天屈。如人之笑。較之以竹鞭犬。稍爲近理。要皆臆造。不可信。

翟義傳

熙我念孺子。師古曰。熙歎辭。

大誥。熙作已。已蓋熙之省文。

谷永傳

傳曰。飢而不損。茲謂泰。厥災水。厥咎亡。師古曰。洪範傳之辭。

按。五行志。乃京房易傳之文。非洪範傳文。

小顏注誤也。五行志。厥咎牡亡。此傳脫牡字。

師丹傳

上於是追尊定陶共王爲共皇帝。帝字衍。下文稱共皇者不一辭。皆不云帝也。詳見定陶王康傳。

揚雄傳

百牙絕絃破琴。卽伯牙也。古文伯百通用。

贊曰。雄之自序云爾。予謂自雄之自序云爾以下。至篇終。皆傳文。非贊也。司馬遷傳亦稱遷之自序云爾。然後別述遷事。以終其篇。與此正同。遷有贊而雄無贊者。篇中載桓譚及諸儒之言。褒貶已見。不必別爲贊也。此贊曰二字。後人妄增。非班史本文。

儒林傳

擇掌故以補中二千石屬。文學掌故補郡屬備員。師古曰。云備員者。示以升擢之。非藉其實用也。按師古說非也。平津本意。以詔書爾雅深厚。非俗吏所解。故選文學掌故補卒史。所謂以儒術緣飾吏事也。安得云不藉其實用乎。備員蓋蒙上不足之文。謂如有不足。當以文學掌故充之。毋使缺額耳。中二千石屬。卽謂內史大行卒史。郡屬卽謂郡卒史。劉敞謂卒史遷而爲屬。亦非是。

沛戴崇子平崇爲九卿。公卿表無崇名。據張禹傳。崇蓋任少府也。

喜因不肯切。切古認字。說文無認。

唯京氏爲異黨。焦延壽獨得隱士之說。託之孟氏。不相與同。師古曰。黨讀曰儻。惠棟曰。按文義。當以黨字屬上句。異黨猶言異類也。

商善爲算。著五行論。厯四至九卿。以公卿表考之。永始三年。詹事許商爲少府。綏和元年。又由侍中光祿大夫爲大司農。其年又遷光祿勳。當云三至九卿也。又據溝洫志。商嘗爲博士。將作大匠。河隄都尉。皆在未爲詹事以前。

號其門人沛唐林子高爲德行。平陵吳章偉君爲言語。重泉王吉少音爲政事。齊快欽幼卿爲文學。班史書人名字。例至精密。它書已見字者。不更書。唐林字子高。已見鮑宣傳。而又書。因三人而類及之也。

王式。東平新桃人也。按地理志。東平國無新桃縣。後漢書光武紀。龐萌蘇茂圍桃城。注。任城國有桃聚故城。在今兗州任城縣北。又劉永傳。龐萌自號東平王。屯桃鄉之北。注。桃鄉故城在今兗州甯邱縣西北。此卽東平之新桃也。

琅邪左咸。咸爲郡守九卿。公卿表。建平元年。左咸爲大司農。三年。爲左馮翊。元壽二年。復由復土將軍爲大鴻臚。元始五年。又爲大鴻臚。蓋四至九卿矣。

循吏傳

九江以召父應詔書。信臣不書名。非史例也。蓋寬饒傳稱魏相爲魏侯。鄭崇。蕭育傳稱貢禹爲貢公。欒傳稱桓譚爲桓生。皆史家刊正。未歸畫一。

酷吏傳

南陽有梅免百政。師古曰。梅百皆姓也。百與伯通。

於是賜小史爵關內侯。食遺鄉六百戶。漢制。列侯大者萬餘戶。小者數百戶。武帝時。襄城侯桀龍四百

戶。騏侯駒幾五百二十戶。瞭侯畢取五百一十戶。荻直侯韓陶五百四十戶。邗侯李壽一百五十戶。壽封

戶太少。疑有誤。而圉小史得食六百戶。是列侯封邑。有時不如關內侯之多也。

便輿出瘞寺門。桓東如淳曰。陳宋之俗言。桓聲如和。今猶謂之和表。師古曰。卽華表也。桓和華聲皆相近。

游俠傳

拜鎮戎大尹。天水太守。按。王莽改天水曰鎮戎。太守爲大尹。旣云鎮戎大尹。不當更云天水太守。疑本

注文。後人誤入正文。

佞幸傳

鄧通蜀郡南安人也。地理志。南安屬犍爲郡。不屬蜀郡。犍爲武帝所置。漢初蓋屬蜀也。

韓嫣弟說亦愛幸以軍功封案道侯。巫蠱時爲衛太子所殺。子增封龍雒侯。維當作頡大司馬車騎將軍自有傳。按說增父子已附韓王信傳。說以愛幸故又牽連書於嫣傳。不必更及其子也。

后姊嬀爲龍雒思侯夫人。雒當作頡。韓寶嗣父增爲龍頡侯。諡曰思。

朱詡子浮。建武中貴顯至大司馬司空封侯。按後漢書浮爲大司空未嘗爲大司馬也。豈以其嘗爲大司馬主簿相涉而誤歟。

南粵傳

故濟北相韓千秋。李陵傳作濟南相。

西域傳下

昆莫王號也。名獵驕靡。後書昆彌云。師古曰。昆莫本是王號。而其人名獵驕靡。故書云昆彌。昆取昆莫。彌取驕靡。彌靡音有輕重耳。蓋本一也。予謂小顏說非也。昆彌卽昆莫。彌莫聲相轉。猶宛王毋寡一作毋鼓。鼓寡聲相轉。其實一耳。莫之爲彌。譯音有輕重。而名號未改。非取王名之一字而沿以爲號也。焉耆國王治員渠城。員渠卽焉耆之轉。與尉犁國王治尉犁城。危須國王治危須城。初不異也。

外戚傳上

孝惠張皇后。少帝恆山。淮南。濟川王皆以非孝惠子誅。淮南當作淮陽。

孝景王皇后。初皇太后微時。所爲金王孫生女。俗在民間。師古曰。言隨俗而在閭巷。未顯貴。予謂俗蓋金氏女之名。

孝武陳皇后。堂邑侯午薨。生男須嗣侯。功臣表作季須。

史皇孫王夫人。封舅無故爲平昌侯。武爲樂昌侯。食邑各六千戶。外戚侯表無故。武皆六百戶。

外戚傳下

孝成許皇后。五月庚子。烏焚其巢。太山之域。五行志。河平元年二月庚子。泰山山桑谷有戲焚其巢。

此作五月誤。下文有三月四月可證。

后姊平安剛侯夫人謁等。董教授曰。表未見此侯。惟卬成家。有安平侯王舜子章。諡剛侯。然非平安也。予謂地理志。千乘郡有平安侯國。當是王舜所封。若豫章郡之安平侯國。則長沙孝王子所封。涿郡之安平。又非侯國也。

孝成趙皇后。票騎將軍貪者錢。不足計事。票騎將軍謂曲陽侯王根也。

於是免新成侯趙欽。欽兄子成陽侯。訢皆爲庶人。按。外戚侯表。成陽節侯趙臨。以皇后父侯。薨。子訢嗣。新成侯欽。以皇太后弟。建平元年。皆坐弟昭儀絕繼。嗣免。表以欽與訢皆爲昭儀之兄。傳以訢爲欽兄子。必有一誤。

孝平王皇后。迎皇后於安漢公第宮。師古曰。本是莽第。以皇后在是。因呼曰宮。董教增曰。此當以第爲句。宮字連下。豐歆讀。卽前文大司徒宮。大司空豐光祿大夫歆三人也。顏氏第宮之說。失之遠矣。

王莽傳上

前將軍何武。後將軍公孫祿互相舉。按公卿表。何武傳俱云。祿爲左將軍。此作後將軍。誤也。

王莽傳中

義陽東都曰六州。地理志。雒陽莽曰宜陽。卽此義陽也。

其以益歲以南村新平。新平故淮陽。蘇林曰。陳畱圉縣。莽改曰益歲。按地理志。圉縣本屬淮陽。不屬陳

畱。豈莽時嘗改屬陳畱乎。圉縣。莽曰益歲。今地理志亦無之。

昏以戊寅之旬爲忌日。莽以戊子代甲子爲六旬首。戊寅旬中無子。故忌之。

王莽傳下

夙夜連率韓博。按地理志。不夜縣。莽曰夙夜。此云連率。則莽嘗置爲郡矣。壽光縣。莽曰翼平亭。而此傳有翼平連率田況。亦其類也。

立安爲新遷王。服虔曰。遷音仙。師古曰。遷猶僂耳。不勞假借音。予謂遷之讀仙。方是古音。律麻志。少陰者。西方西遷也。陰氣遷落物。西遷聲相轉。猶尙書大傳云。西方鮮方也。莽稱紫閣圖文。太一黃帝。皆得

瑞以遷今本或作僊所謂新遷者乃太一新遷之後也。諸遷字皆作僊解。故知服音爲是。

直貨錢二十五。食貨志作貨泉。錢卽泉字。

會世祖與兄齊武王伯升。伯升光武之兄。故字而不名。劉聖公光武所事也。故亦稱字。

迫措前隊醜虜。莽改南陽爲前隊。所云醜虜。指光武兄弟也。孟堅於王莽指斥之詞。無所隱諱。所以著

莽之惡於光武盛德。初無損也。

敘傳上

上於是引商丹入爲光祿大夫。伯遷水衡都尉。與兩師竝侍中。按公卿表。元延元年侍中光祿大夫趙

彪。大伯爲侍中。水衡都尉。三年卒。計其年。正許商師丹除侍中。光祿大夫之時也。伯爲水衡都尉。表不

應失載。疑趙彪卽班伯之譌。

旣繫攀於世教矣。攀古戀字。說文無戀。

思有短褐之褻。短當作短。說文短。豎使布長襦。貢禹貨殖傳竝有短褐不完之語。

又況么磨尙不及數子。鄭氏曰。磨音麼。小也。晉灼曰。此骨偏磨之磨也。師古曰。鄭音是也。骨偏磨。自音麻。

與此義不相合。晉說失之。予按說文無麼字。徐鉉等新附而有𦓐字。𦓐。癩病也。與磨同。么言其小。磨言其

病。童謠所稱見一蹇人。言欲上天。隗囂少病蹇。以是刺之也。晉說得之。

吹中蘇爲庶幾兮。師古曰。吹古聿字。吹从日。不从日。詩。遙求厥寧。說文引作吹。

敍傳下

漚漚紛紛。卽呂刑泯泯焚焚也。漚泯聲相近。詩。緜緜其鹿。韓詩作民民。

六世耽耽。其欲澈澈。易。其欲逐逐。子夏傳作攸攸。蘇林音攸爲迪。迪逐聲相近。

廿二史考異卷九

漢書四

侯國考

漢制列侯所食邑爲侯國。西京侯者封戶有多少。所食或盡一縣。或止一鄉一亭。皆以侯國稱之。如陳平封陽武之戶牖鄉。公孫丞相封高成之平津鄉。匡衡封僮之樂安鄉。師丹封厚邱之中鄉。何武封不其之汜鄉。所食不過一鄉。皆別於縣。而自爲侯國。恩有降殺。秩無尊卑也。後漢始定爲都鄉侯、鄉侯、都亭侯。亭侯之差。於是有侯而不爲國者矣。高祖之世。功臣侯者百五十餘人。其封邑所在。班孟堅已不能言之。武昭以後侯者。班表始著其地。亦有不備者。蓋疑而闕之。或轉寫脫去也。地理志載侯國。皆據當時見存者。若中山之曲逆。陳平所封。清河之鄒。欒布所封。南陽之冠軍。霍去病所封。汝南之定陵。淳于長所封。丹陽之秣陵。胡孰。江都。易。王子所封。魏之陰安。濟北。貞。王子所封。志皆不云侯國者。其時國已除也。考哀平間侯國志皆不書。王子侯表堂鄉以下十一侯。恩澤侯表殷紹嘉以下三侯。皆成帝綏和以後所封。而志亦不之及。然則志所書侯國。蓋終於成帝元延之末。惟博山一侯。或後人增加也。志稱侯國二百四十一。今數之。止百九十有四。予證以諸表。各標其始封姓名。又補志之失注者二十五人。後之讀班史者。庶有取

焉。

河東郡。

騏駒幾

東郡。

陽平。王禁志失注。

陳留郡。

長羅。常惠

潁川郡。

成安。郭忠

汝南郡。

陽城。劉德

宜春。王訢

歸德。先賢

安陽。王音

周承休。姬延年

安成。王崇

弋陽。任宮

安昌。張禹

博陽。丙吉

成陽趙臨

南陽郡

鄧何

安衆王子沙定丹

新都王莽

樂城許延壽

復陽王子沙頃王延年

南郡

高成長沙頃王子梁表作高城志勃海亦

江夏郡

鍾武長沙頃王子度

廬江郡

松茲六安共王子霸

九江郡

博山孔光

春陵王子沙定

紅陽王立

博望許舞

當塗魏不害

曲陽王根

山陽郡

城都上商都表

爰戚趙長年

中鄉梁敬王延年

鄭梁敬王子罷軍

栗鄉東平思王子護

西陽山平王表在東萊

沛郡

廣戚楚孝王子勲

敬邱魯共王子政此

建成黃霸

栗趙敬王樂子

博鄉六安繆王交

黃梁敬王子順表在濟陰

郟成王奉光封郟當作郟表在濟陰

平樂梁敬王子遷

留鄉梁敬王子就表在濟南

曲鄉梁荒王子鳳表在濟南

公邱魯共王子順

汶趙敬王周舍

建平杜延年表在濟陽

扶陽章賢

高梁敬王
子舜

漂陽梁敬王子欽
志失注

東鄉梁敬王子方
志失注

義成甘延壽
志失注

魏郡

卽裴趙敬肅王子道
表作柳裴在東海

平恩許廣
漢

鉅鹿郡

象氏趙敬肅
王子賀

安定燕刺王
子賢

樂信廣川繆
王子疆

柏鄉趙哀王
子買

常山郡

桑中趙頃王
子廣漢

高柴梁敬王
子發

平阿譚王

臨都梁敬王子未
央志失注

祁鄉梁夷王
子賢

邯會趙敬肅
王子仁

邯溝趙頃王子偃
表作邯

新市廣川繆
王子吉

歷鄉廣川繆
王子勝

武陶廣川繆
王子朝

安鄉趙哀王
子喜

封斯趙敬肅王
子胡傷

樂陽趙頃王

都鄉趙頃王景表在東海

清河郡

東陽清河宏

涿郡

廣望中山靖王忠

樊輿中山靖王修

良鄉趙共王子交封梁鄉侯或即此

臨鄉城陽頃王子雲表誤城

陽鄉廣陵頃王子發

阿武河間獻王子

新昌燕刺王子慶

勃海郡

定齊孝王子越

平臺元史

信鄉清河網王子豹表作新鄉

州鄉河間獻王禁

成中山康王子喜

利鄉中山頃王子安表在常山

益昌廣陽頃王子嬰

西鄉廣陽頃王子容

高郭河間獻王子

參戶河間獻王子免

柳子齊陽孝王

脩市清河網

章鄉鍾祖表

平原郡

平昌王無

富平張安

樓虛順

安濟北貞王樂表安陽

千乘郡

平安王舜封安平侯即此史記將相

繁安齊孝王

濟南郡

朝陽廣陵厲

宜成燕倉表作

臨樂中山靖

景成河間獻

蒲領清河綱

羽濟北式

合陽喜

龍額韓

被陽齊孝王

延鄉李譚注

獠趙敬肅

宜成燕倉表作

朝陽廣陵厲

宜成燕倉表作

宜成燕倉表作

泰山郡

柴齊孝王子代
志失注

富陽東平思王子
萌平思王子
志失注

桃鄉東平思
王子宣

齊郡

廣便菑川孝王子
志失注

北鄉菑川孝
王子譚

臺鄉菑川孝王子
志失注

北海郡

劇魁菑川懿
王子黑

劇王子錯

平的菑川懿
王子強

樂望膠東戴
王子光

平城膠東頃
王子邑

寧陽魯共王
子恬

桃山城陽孝
王子欽

式城陽荒王子
憲志失注

廣饒菑川靖王子
國志失注

平廣菑川孝王子服
封平侯當即此

瓠城陽頃
王子息

平望菑川懿
王子賞

柳泉膠東戴王子疆
表在南陽

饒膠東康王子有成侯饒
疑表誤當為饒侯成也

密鄉膠東頃
王子林

羊石 膠東頃

石鄉 膠東頃

新成 膠東頃 王新子根

膠陽 高密頃 王名當是膠陽也

東萊郡

平度 菑川 懿王 志失注

牟平 齊孝王 子濼 志失注

徐鄉 膠東共王 在齊 志失注

琅邪郡

虛水 城陽 頃 王禹

祓 城陽 頃 王即此 封挾侯

零段 城陽 頃 王子澤 志作康

稻 齊孝王 子定

魏其 膠東 康 王子昌

樂都 膠東 頃 王新

上鄉 膠東 頃 王歛

成鄉 高密 頃 王安

臨胸 菑川 懿王 志失注 表在東海

陽樂 膠東 頃 王即此 疑王獲封

臨原 菑川 懿王 子始昌 表在臨原 注云臨原史記作

餅 菑川 靖 王子成

雲 齊孝王 子信

皋虞 膠東 康 王子建

茲鄉 城陽 荒 王子宏

箕城王陽荒文

高鄉城子陽惠

即來城子湯荒

武鄉城子高密頤

新山忠稱

昆山城子陽荒

折泉城子陽荒

房山城子陽荒

駟望廣洽

高陵進翟方

石山城子陽戴

東海郡

良成子魯安王

南成城陽共王子貞

高廣城子陽荒

柔城陽荒王子山封棗

麗高密共王子賜封

伊鄉城子陽戴

高陽宣薛

參封城子陽戴

博石城子陽荒

慎鄉表未

安邱高子密頃

臨安膠東共

蘭祺魯安王子臨朝

山鄉魯孝王

建鄉。魯頃王

東安。魯孝王

于鄉。泗水勤

都陽。城陽戴

都鄉。魯頃王

新陽。魯頃王

昌慮。魯孝王
表在泰山

臨淮郡

西平。于定國
志失注

開陵。成婉

廣平。廣陵孝
王子德

襄平。廣陽屬
王子豐。劉放曰
廣陽無厲王當是廣陵

豫章郡

海昏。昌邑哀王
賀。志失注

容邱。魯安山王

建陽。魯孝王

平曲。廣陵屬
王子曾

陰平。楚孝王

武陽。丹史

建陵。魯孝王

都平。城陽荒
王子邱

高平。王逢
時

昌陽。泗水戾
王子霸

蘭陽。廣陵孝王
侯。即此

樂陵。高史

安平。長沙孝王
子習。表在鉅鹿

桂陽郡

陽山長沙王子宗

零陵郡

夫夷長沙義長沙王子注

泉陵長沙表定王子賢

廣平國

南曲清河志綱王子注

廣鄉平表在鉅鹿王子明

平鄉平表在魏郡王子注

城鄉平表作成鄉王子慶

信都國

樂鄉河表在鉅鹿王子終

桃廣表在鉅鹿王子良

昌成廣王子元

陰山表未

都梁長王子定

曲梁平志在魏郡王子敬

平利平表在魏郡王子世

陽臺平封陽城侯王子田

平隄河表在鉅鹿王子招

西梁廣表在鉅鹿王子關

東昌清王子成

志未見者

利昌代共王子嘉

頃陽膠東頃王子共

卑梁高密頃王子都

陵石膠東共王子慶疑即東萊之陽石

懷昌菑川懿王子高遂史記作壤

昌鄉膠東頃王子憲以元壽二年免

葉邱東平思王子頃疑即泰山之乘邱葉字誤

樂昌王武表在汝南

問侯國例不屬諸侯王。故王子而侯者，必別屬漢郡。廣平信都亦諸侯王國也。而得有侯國，何故？曰：班志郡國之名，以元始二年戶口籍為斷。其侯國之名，則以成帝元延之末為斷。元延之世，廣平信都皆郡也。非國也。國已除為郡，則從前之改屬它郡者，復返其舊。迨哀帝建平中，復置此二國，則侯國必仍改屬它郡。特史家不能一一載之爾。試觀廣平領縣十六，而戶止二萬七千有奇。信都領縣十七，而戶止六萬五千有奇。以附近郡國準之，不應縣多而戶少。乃爾。蓋改郡為國之後，未必仍領若干縣也。

廿二史考異卷十

後漢書一

光武帝紀上

高祖九世之孫也。按紀傳所述世數多不一例。此紀光武爲高祖九世孫。自高祖至光武九世。實八世孫也。皇后紀伏后爲大司徒湛八世孫。自湛至后八世。實七世孫也。至劉永傳稱梁孝王八世孫。自孝王至永父立已八世矣。如依二紀之例。亦當云九世孫也。考班史諸表。自始封至子孫。曾孫。玄孫。玄孫之子。卽爲六世。此以封爵之世次言。故合始封計之。他傳則否。孔光傳云孔子十四世孫。自孔子至光實十五世。推此論之。當以永傳爲是。

立劉聖公爲天子。范史於淮陽王聖公。齊武王縝皆字而不名。蓋殊於諸王也。漢書王莽傳。聖公伯升皆不名。

驃騎大將軍宗佻。注。驃騎大將軍武帝置。自霍去病始。按去病爲驃騎將軍。無大字。

又別號諸賊銅馬。大彤。高湖。重連。鐵脛。大槍。尤來。上江。青犢。五校。檀鄉。五幡。五樓。富平。獲索等。按鐵脛。上江。五樓。紀不載其後事。馮異傳。擊破鐵脛於北平。吳漢傳。與偏將軍馮異。擊昌城。五樓賊張文等。破

之。

建武元年以前高密令卓茂爲太傅。注：高密縣屬高密國。今密州縣故城在今縣之西南。按：卓茂傳作

密令。注云：密今洛州密縣也。傳稱天下大蝗，河南二十餘縣皆被其災，獨不入密縣界，則茂作令在河

南之密，非高密矣。紀文衍一高字，章懷不能考正，隨文注之，以致自相抵牾。水經注：密縣城東門南側有漢密令卓茂祠。

二年，強榦弱枝，所以爲治也。章懷避唐諱，凡治字多改爲理，或爲化。今本閒有作治者，皆宋人校改。

真定王楊。劉植耿純傳皆作楊。

臨邑侯讓。耿純傳作林邑。

三年，西州大將軍隗囂。按：隗囂傳自稱西州上將軍，自是名震西州，命囂爲西州大將軍，每及西州之

事，公孫述傳使西州豪傑來歛，傳西州未附，西州方略，西州士大夫皆信重之，西州新破，竇融傳西州

地勢局促，西州豪傑遂復附從，馬援傳因畱西州，常獨爲西州言，拔自西州，卒破西州，耿恭傳安豐侯

竇融昔在西州，鄧騭傳涼部叛羌搖蕩西州，杜林傳問以經書故舊及西州事，林前於西州得漆書古

文尚書，申屠剛傳西州發兵，人人懷憂，龐參傳方今西州流民擾動，乃爲西州士大夫所笑，虞詡傳辟

西州豪傑爲掾屬，橋玄傳上邽姜岐守道隱居，名聞西州，皇甫規傳爰自西州侵及涇陽，自以西州豪

傑，鄭太傅明公出自西州，趙壹傳竊伏西州，皆謂涼州也，陳寵傳西州豪右并兼，廉范傳父客死於蜀

漢范滂流寓西州。西州平歸鄉里。任文公傳。西州智士死我乃當之。謂益州也。陳龜傳。今西州邊鄙土地墾墾。則兼并涼二州言之。光武紀。後拔邯鄲。北州弭定。彭寵傳。使謁者韓鴻持節徇北州。北州衆多疑惑。是時北州破散。而漁陽差完。吳漢傳。北州擾惑。北州震駭。鄧禹傳。北州略定。景丹傳。景將軍北州大將。劉植傳。北州疑惑。朱浮傳。北州憂恐。劉虞傳。虞以恩厚得衆。懷被北州。烏桓傳。北州乃定。皆謂幽州也。崔寔傳。寔從兄烈。有重名於北州。烈。涿郡安平人。安平。後屬博陵郡。伏恭傳。由是北州多爲伏氏學。恭爲常山太守。謂冀州也。溫序傳。將兵平定北州。陳龜傳。便習弓馬。雄於北州。董卓傳。乞將之北州。效力邊垂。謂并州也。魯恭傳。是時東州多盜賊。鄭太傅。東州鄭玄。學該古今。謂青州也。伏湛傳。東州號爲伏不鬪云。湛。琅邪人。謂徐州也。陳俊傳。東州新平。則兼青徐二州言之。樊準傳。今雖有西屯之役。宜先東州之急。鄧皇后紀。又遭水潦。東州饑荒。此又兼兗冀徐諸州言之矣。王常傳。娶始不量愚臣。任以南州。注。謂行南陽太守。桓帝紀。盜賊徵發。南州尤甚。謂荊州也。郭太傳。始至南州。過袁奉高。不宿而去。從叔度累日不去。謂豫州也。袁黃皆汝南人。張綱傳。南州晏然。許荆傳。郡濱南州。徐穉傳。此必南州高士。徐孺子也。謂揚州也。張綱爲廣陵太守。在徐州部。而與揚境密邇。故亦有南州之稱矣。南蠻傳。南州水土溫暑。謂交州也。鄭均傳。前安邑令毛義。淳潔之風。東州稱仁。方術傳。會稽謝夷吾。出自東州。義廬江人。廬江會稽皆屬揚州。當云南州。而稱東州者。揚在雒陽之東南。職方氏。東南曰揚州。故亦可稱東州也。劉焉傳。南陽三輔民數萬戶。流入益州。

焉悉收以爲衆名曰東州兵。此因益州在西故呼中土爲東州。非史家之通稱也。
四年進幸臨平。注縣名屬鉅鹿郡。按續志無此縣。蓋建武六年所省。

光武帝紀下

七年詔郡國出繫囚見徒免爲庶民。按章懷注范史避太宗諱民字皆改爲人。如光武紀兆人塗炭爲人父母祖宗之靈士人之力是也。今本仍有作民者。則宋以後校書者回改。然亦有不當改而妄改者。如建武七年詔郡國出繫囚見徒免爲庶民。十一年詔敢灸灼奴婢論如律免所灸灼者爲庶民。十二年詔隴蜀民被略爲奴婢自訟者及縣官未報一切免爲庶民。十三年詔益州民自八年以來被略爲奴婢者皆一切免爲庶民。十四年詔益涼二州奴婢自八年以來自訟在所官一切免爲庶民。殤帝延平元年詔宗室坐事沒入宮者今悉免遣及掖庭宮人皆爲庶民。此庶民本當作庶人。校書者不知庶民與庶人有別而一例改之。然建武五年詔郡國出繫囚見徒免爲庶人。六年詔王莽時吏人沒入爲奴婢不應舊法者皆免爲庶人。此兩處仍未改也。凡律言庶人者對奴婢及有罪者而言。與它處泛稱庶民者迥乎不同。今本有改有不改。由當時校書不出一手故爾。又崔寔傳引景帝詔曰加笞與重罪無異幸而不死不可爲民。此亦不當改而妄改者也。又一卷之中或改或否。如明帝紀中元二年詔流人無名數欲自占者人一級。永平三年詔流人無名數欲自占者人一級。十七年詔流人無名數欲自占者人一級。十七年詔流人無名數欲自占者人一級。

者人一級而永平十二年十八年俱云流民無名數欲占者人一級魯恭傳前云萬人之命在於一舉後云萬民者天之所生又有一文重見而或改或否如光武紀民無所措手足章帝紀人無所措手足梁統傳人無所厝手足郎顛傳安上理人莫善於禮張純傳安上治民莫善於禮苟爽傳同又如逸民傳章懷本改爲逸人今雖已回改而法雄傳中逸人字仍未改皆校書者之不學也

八年河西太守竇融按河西非郡名不當有太守當依前五年作河西大將軍

率五郡太守與車駕會高平注五郡謂隴西金城天水酒泉張掖按隴西天水二郡非竇融所統當從融傳以武威敦煌足五郡之數

十三年二月丙辰詔曰長沙王興真定王得河閒王邵中山王茂皆襲爵爲王不應經義按真定王得卽建武二年所封真定王楊子德也德得古字通此景帝子常山憲王之後也中山王茂光武族父建武元年封亦長沙定王之後河閒王邵建武七年以故河閒王封未詳其世系長沙王興當亦定王之後史不爲立傳而本紀亦不載受封年月疑與邵皆嬰始所封也

丁巳降太原王章爲齊公魯王興爲魯公按齊武王傳建武二年立章爲太原王十一年徙章爲齊王是章由齊王降封公紀云太原王者誤也齊魯二王降封本傳俱不載建武十九年進齊魯公爵爲王傳亦不書皆史之疏也

省并西京十三國。廣平屬鉅鹿。真定屬常山。河閒屬信都。城陽屬琅邪。泗水屬廣陵。淄川屬高密。膠東屬北海。六安屬廬江。廣陽屬上谷。注據此。惟有九國。云十三。誤也。按續志北海國下云。建武十三年。省菑川高密膠東三國。今本省以其縣屬。蓋其時以高密四縣封鄧禹。膠東六縣封賈復。故不立王國。而竝屬之北海。高密與淄川同在省并之內。非以淄川屬高密也。志又稱世祖并省郡國十。今并高密計之。正合十國之數。乃知紀云十三國者。誤衍三字。而淄川下又衍屬字耳。章懷注據紀文止有九國。以證十三之誤。則知唐初此本已誤矣。

十五年正月丁未。有星孛於昴。丁未。有星孛於營室。丁未重出。當有一誤。以天文志證之。似下丁未誤也。予以四分術推得是年正月戊寅朔。則丁未爲月之三十日。彗星見四十九日而滅。其滅當在三月十九日乙未。而志云二月乙未滅。亦誤。

十七年二月乙亥晦。日有食之。五行志作乙未。

十九年正月。追尊孝宣皇帝曰中宗。始祠昭帝。元帝於太廟。按祭祀志。是年雒陽高廟四時加祭。孝宣孝元。凡五帝。此云昭帝。誤。

於赫有命。系隆我漢。蔚宗宋人。不應有我漢之稱。此必沿東觀舊文。

永平三年去其螟蛾。注。蛾一名短狐。蛾當爲蟻。卽騰字。爾雅作蟻。注以爲短狐。失之。
十三年十月壬辰晦。日有食之。五行志作甲辰。

注。仲叔圍治賓客。下兩治字作主。蓋章懷所改。此治賓客之治。又後人回改。

十七年正月甘露降於甘陵。按清河之甘陵本厝縣。安帝始改名。下應此時先有之。恐有譌字。
注。楊浮異物志。浮當作孚。

章帝紀

建初四年七月葬明德皇太后。按光烈、章德、和熹、安思、順烈、桓思、靈思諸后之葬。皆書皇后。此獨書太

后。太字疑衍。

孔子曰。學之不講。是吾憂也。又曰。博學而篤志。切問而近思。仁在其中矣。按博學以下。乃子夏之言。非

孔子語。蔡邕傳。小能小善。雖有可觀。孔子以爲致遠恐泥。亦子夏語也。漢書藝文志引雖小道。必有可觀者焉。王充論衡引死生有命。紂之不善。不如是之甚。皆以爲孔子語。說者以爲古人引書多誤。其實非也。考藝文志云。論語者。孔子應答弟子時人及弟子相與言。而接聞於夫子之語也。云接聞於夫子。則其言皆孔子所取矣。故漢人引論語。雖弟子之言。皆歸之孔子。非由記憶之誤。

六年五月辛酉。趙王盱薨。按趙王良傳。子節王栩嗣。立四十年薨。而本紀中元元年。永平六年竝書趙

王盱。惟永平五年書趙王栩。必有一誤。栩與盱音相近而譌也。

元和二年四月乙巳。客星入紫宮。天文志作元年四月丁巳。

春秋於春每月書王者。重三正。注禮記曰。正朔三而改。文質再而復。此禮三正記之文。注脫三正二字。章和元年七月。燒當羌寇金城。護羌校尉劉盱討之。以西羌傳校之。其時校尉乃張紆。非劉盱也。八月乙未晦。日有食之。五行志在元和元年。此上文已書乙未幸沛。又重書乙未。

和帝紀

孝和皇帝諱肇。注臣賢案。許慎說文。肇音大可反。上諱也。按說文云上諱者。乃从戈之肇。非从支之肇。且說文無反切。乃後人所增益。章懷以爲說文有音者。非也。今本說文用孫愐唐韻切音。讀肇爲直小切。與兆音同。不知何以有大可切之音。疑卽直小兩字之譌。

永元三年。阜陵王种薨。按光武十王傳作冲。說文無种字。种卽冲也。

詔曰。高祖功臣。蕭曹爲首。有傳世不絕之義。曹相國後容成侯無嗣。顧淞曰。此詔蕭曹竝舉。而獨云曹

相國後無嗣。則鄼侯有後矣。今據前書功臣表。鄼侯九世孫禹王莽。建國元年。更爲蕭鄉侯。莽敗絕。而平陽侯十世孫宏。光武建武二年。以舉兵佐軍。紹封傳子曠。表云。今見。則孟堅修史時尙存也。與此詔正相反。未知其審。予按。韋彪傳亦云。建初七年。詔求蕭何後。封何末孫熊爲鄼侯。建初二年。已封曹參。

後曹湛爲平陽侯。故不及焉。則曹之有後審矣。而一云建武所封。一云建初所封。其名又復互異。且班表韋傳皆云平陽侯。而此詔稱容成侯。皆事之可疑者也。

四年射聲校尉郭璜。璜子侍中舉。按天文志。郭舉爲侍中射聲校尉。舉父璜。長樂少府。皇后紀。璜似誤。

九年越騎校尉趙世等。西羌傳作趙代。蓋章懷避唐諱改之。趙熹傳亦作代。此紀作世。又唐以後人回改。

十一年復置右校尉官。注東觀記曰。置在西河鵠澤縣。按郡國志無鵠澤縣。蓋後漢并省。據此記。則和帝時尙未省也。

安帝紀

恭宗孝安皇帝。按獻帝初平元年。有司奏和宗。穆安宗順宗敬宗桓威宗四帝無功德。不宜稱宗。故和帝順帝桓帝紀俱不稱某宗。獨此紀書恭宗。蓋刪之不盡也。

永初元年。封帝弟常保爲廣川王。按安帝弟名常保。而子亦名保。當有一誤。

三年。大鴻臚九江夏勤爲司徒。按范史三公除拜。皆載於本紀。其人無傳者。則書郡以顯之。用班史公卿表之例也。夏勤事已附見樊儵傳。延光二年。東萊劉熹爲司徒。熹名見馮魴傳。陽嘉二年。沛國施延

爲太尉。延名見陳忠傳。於例皆不必書郡。

四年徙金城郡都襄武。漢時郡所治亦曰都。臧洪傳。徙爲東郡太守。都東武陽是也。

元初四年二月乙巳朔。日有食之。五行志作乙亥。

延光三年九月庚申晦。日有食之。五行志作庚寅。

四年侍中謝暉。據后妃傳。暉爲虎賁中郎將。非侍中也。侍中當是加官。

順帝紀

永建二年。注。劉光字仲遼。卽太尉劉矩之弟。按。劉矩傳稱叔父光。此注誤。風俗通。劉矩父字叔遼。

陽嘉元年。海賦。曾旌等寇會稽。天文志。作曾於古書。旌或作旒。於當是旒之譌。

分禱祈請。靡神不禱。按。雲漢詩云。上下奠瘞。靡神不宗。毛訓宗爲尊。漢時三家詩。必有作禱字者。祭法。

雩宗。祭水旱也。鄭讀宗爲禱。是宗與禱通。注以靡神不舉釋之。似未然。

楊州六郡妖賊章河等。天文志。作章何。

建康元年。遣御史中丞馮赦。活作馮緄。

桓帝紀

建和二年。封帝弟。願爲平原王。奉孝崇皇祀。河閒王開傳云。更封帝兄都鄉侯。碩爲平原王。與紀互異。

三年。監寐寤歎。疾如疾首。監寐猶假寐也。監假聲相近。劉陶傳。屏營彷徨。不能監寐。袁紹傳。我州君臣。監寐悲歎。

延熹元年。分中山置博陵郡。子弟晦之曰。按。隸釋。靈臺碑有博陵。蠡吾。管遵。又孔彪碑陰。故吏有博陵。

安平六人。博陵安國三人。博陵高陽一人。博陵南深澤二人。安國。蠡吾。故屬中山。安平。南深澤。高陽。故

屬河閒。然則博陵一郡。兼得中山。安平。河閒之地。不獨分中山也。黨綱傳。劉祐。中山安國人。安國後別屬博陵。

五年四月乙丑。恭陵東闕火。注。安帝陵也。五行志作恭北陵。恭北陵者。順帝母李氏陵也。

八年己酉。南宮嘉德署黃龍見。千秋萬歲殿火。按。此上承正月丙申晦日食。則己酉上當脫二月兩字。

五行志亦云二月也。依此文。似龍見一事。火災又一事。志於黃龍下無見字。萬歲殿下多皆字。則黃龍

亦是殿名。與嘉德署同日火也。

五月丙戌。太尉楊秉薨。按。風俗通云。六月九日未明。太尉楊秉暴薨。應劭與秉同時。共記月日。當可信。

九年正月辛亥朔。日有食之。五行志作辛卯。

九月。南陽太守成瑨。太原太守劉質。竝以譖棄市。按。陳蕃。王允。劉般。襄楷傳。俱作劉瓚。考。說文無瓚字。

當以質爲正也。瑨。質。被譖棄市。據陳蕃傳。在延熹八年。時蕃爲太尉。上疏極諫。明年。李膺等以黨事下

獄。蕃又疏諫。帝惡其切直。託以辟召。非人策免。紀書此事於蕃免官之後。似失其次矣。天文志在九年十一月。

靈帝紀

父萇。世封解瀆亭侯。按董皇后紀亦稱解瀆侯萇。獨河閒王開傳作長。古書長萇多通用。

建寧二年十月。司隸校尉朱瑀。按黨錮及竇武傳皆作朱寓。此作瑀。誤。同時有長樂五官史朱瑀。乃宦

官黨於曹節者。見竇武傳此別是一人。

庚子晦。日有食之。五行志作戊戌。此誤。

三年。濟南賊起。攻東平陵。注東平陵縣名。故城在今濟州東。濟州當作齊州。

熹平元年。甘陵王恢薨。按清河王慶傳。梁太后立安平孝王子經。侯理爲甘陵王。是爲威王。理立二十

五年薨。子貞王定嗣。定立四年薨。子獻王忠嗣。別無名恢者。考理以桓帝建和二年封。至熹平元年。恰

二十五年。則恢與理實一人也。

三年。中山王暢薨。無子國除。按中山王焉傳。穆王暢立三十四年薨。子節王稚嗣。無子國除。是暢本有

子。而國亦未卽除也。

四年。封河閒王建孫佗爲任城王。按光武十王傳。佗爲建子。非建孫。

六年。衛尉陳球爲司空。按球傳。其時爲廷尉。非衛尉。

太常河南孟馘爲太尉。按成陽堯廟碑。濟陰太守河南庾師卽偃。孟府君諱郁。字敬達。治尙書。經歷典

六郡威教若神。卽其人也。馘與郁同。碑立於永康元年。至熹平六年。相距十年矣。注云字叔達。而碑云敬達。叔敬二文相似。碑已亡失。莫能決其然否。

中平元年。下邳王意薨。無子國除。按。下邳王衍傳。中平元年。意薨。子哀王宜嗣。數月薨。無子。建安十一年。國除。是意亦有子。

二年二月己亥。廣陽門外屋自壞。五行志作癸亥。予以四分術推得是年二月庚子朔。不得有己亥日。

紀誤。

十月庚寅。司空楊賜薨。以四分術推。是月丙申朔。無庚寅。庚寅乃九月二十四日也。月日必有一誤。

四年。護烏桓校尉公綦稠。劉虞傳作箕稠。

獻帝紀

興平元年。是歲穀一斛五十萬。自是歲以下百一十五字。又見董卓傳。當刪彼存此。

三年。殺光祿勳鄧泉。五行志作鄧淵。此作泉者。章懷避諱改。

建安元年。封衛將軍董承爲輔國將軍。伏完等十三人爲列侯。按。董卓傳。是時按董承伏完等十餘人。

爲列侯。董承下不當有爲字。十三人者。董承、伏完、丁中、种輯、鍾繇、郭漙、董芬、劉艾、韓斌、楊衆、羅邵、伏德。

趙韡也。見袁宏後漢紀。但伏完襲父爵不其侯。當在桓靈之世。豈待此時始封列侯。此史文之可疑者。竊意完

但增加食戶。其子德別受列侯之封耳。

五年。越騎校尉種輯。董卓傳作長水校尉。

六年三月丁卯朔。日有食之。五行志作十月癸未。

十一年。濟北海。阜陵。下邳。常山。甘陵。濟陰。平原。八國皆除。通鑑作齊北海。閩本亦是齊字。今本作濟。轉

寫之譌也。明帝子濟陰王長早薨。無後。安帝廢太子保爲濟陰王。其後人承大統。卽順帝也。此後無封濟陰者。必濟北之譌。

十七年。立皇子敦爲東海王。按東海王祇以建安五年薨。子羨嗣。魏受禪始除。不應別封皇子。當是北

海之譌。

十九年。討朱建於枹罕。天文志作宋建。董卓傳作宗建。三國志亦作宋建。

二十二年。丞相軍師華歆爲御史大夫。按魏志華歆傳云。魏國初建。爲御史大夫。是歆爲魏國之御史

大夫。非漢廷之御史大夫也。劉昭注百官志云。建安十三年。罷司空。置御史大夫。御史大夫。郗慮免。不

得補考。建安十九年。廢皇后伏氏。慮尙在職。至廿一年。封魏王操。則宗正劉艾行御史大夫事。廿五年

禪位。則太常張音行御史大夫事。然則郗慮以後。漢廷無眞授御史大夫。其說信矣。魏志太祖紀書華

歆爲御史大夫。而不書郗慮爲漢臣。歆爲魏臣故也。歆之除授。不當書於漢紀。且使歆而得書。則鍾繇

爲相國何以轉不書乎。蔚宗未達官制，因有此誤。

皇后紀上

世譏范蔚宗創爲皇后紀，非也。晉書稱華嶠作漢後書九十七卷，有帝紀十二卷，皇后紀二卷，嶠以皇后配天作合，前史作外戚傳以繼末編，非其義也。故改皇后紀，次帝紀之下，然則皇后之紀，乃嶠自出新意，蔚宗特因之不改爾。

親屬別事，各依列傳，其餘無所見，則係之此紀。注謂賈貴人、虞美人之類是也。此言后妃親屬，如陰馬、鄧竇之倫，事迹昭著，別爲列傳，其無事可見者，附入此紀，不更立外戚傳。若郭況、閻顯、鄧康之類是也。注似未達其旨。

郭皇后，后從兄竟，以騎都尉從征伐有功，封爲新鄴侯，官至東海相，竟弟匡爲發干侯，官至太中大夫。按新鄴侯竟，發干侯匡，歷官具詳於後，此文可省并也。今依史通點煩之例，可省二十字。

竇皇后，扶風平陵人。按馬皇后，援之少女，梁貴人，竦之女，鄧皇后，禹之孫，和帝陰皇后，光烈后兄識之曾孫，獻帝曹皇后，操之中女，援、竦、禹，識皆有傳，操之大父騰，亦見宦者傳，故史不言某郡縣人。竇皇后，融之曾孫女，而又書扶風平陵人，伏皇后，湛之八世孫，而又書琅邪東武人，是自亂其例也。班超、彪之少子，而又書扶風平陵人，黃瓊，香之子，而又書江夏安陸人，荀彧、淑之曾孫，而又書潁川潁陰人，鄭

太衆之曾孫。而又書河南開封人。周舉防之子。而又書汝南汝陽人。皇甫嵩規之兄子。而又書安定朝那人。伏恭湛之兄子。而又書琅邪東武人。袁紹湯之孫。袁術逢之子。而又書汝南汝陽人。李固郃之子。而又書漢中南鄭人。法真雄之子。而又書扶風郿人。周燮燕之後。而又書汝南安城人。皆繇複可省。梁貴人。上尊諡曰恭懷皇后。與姊大貴人俱葬西陵。儀比敬園。注。敬園。安帝祖母宋貴人之園也。按。注說非也。章帝葬敬陵。以竇皇后合葬。而梁太后別葬西陵。史稱儀比敬園者。謂置令丞守衛如敬陵之制。百官志。每陵園令各一人。掌守陵園。案行掃除。故稱敬陵曰敬園。猶西京之高園文園也。若清河王慶之母宋貴人。別葬樊濯聚。和帝時。慶欲求作祠堂。恐有自同恭懷梁后之嫌。遂不敢言。安得有敬園之稱乎。其後安帝嗣立。追尊祖母爲敬隱皇后。距恭懷改葬。二十餘年矣。祭祀志。安帝建光元年。追尊祖母陵曰敬北陵。亦就陵寢祭。太常領如西陵。此則敬北陵之儀比西陵耳。章懷何不考其年代。而妄爲之說乎。

皇后紀下

宋皇后。父酆。執金吾。封不其鄉侯。按。伏湛於建武六年封不其侯。傳國八世。至獻帝時始絕。而宋酆於靈帝之世。得封不其鄉侯者。伏氏食邑三千六百戶。除所食之外。尙有它鄉也。

其職僚品秩事。在百官志。按。蔚宗志今已失傳。其名目可考者。有五行天文志。見蔡邕傳。有禮樂輿服。

志見東平王蒼傳。有百官志見此紀。

建武十五年封舞陽長公主。

當作舞陰。梁松傳尚舞陰公主。

按舞陰與涅陽館陶二主同時以皇女封。但當云公主耳。

其加長字當在明章之世。史家省文併作一事書之也。蔡邕獨斷云帝女曰公主。姊妹曰長公主。此漢家故事。章懷據此文謂帝女尊崇亦爲長。非惟姊妹失其旨矣。

廿二史考異卷十一

後漢書二

劉聖公傳

更始復疑王匡、陳牧、成丹、與張卬等同謀。乃竝召入。牧、丹先至。卬乘之。按鄧禹傳言更始諸將王匡、胡殷、成丹等皆詣宗廣降。則丹未嘗斬也。二傳必有一誤。

子巡嗣。復徙封灌澤侯。注灌澤今澤州縣。灌澤當爲濩澤。

劉永傳

西防賊帥山陽俊疆。注西防縣名。故城在今宋州單父縣北。郡國志未見此縣。前志山陽郡有西陽縣。

陽防字形相似。

隗囂傳

庶無負子之責。史記魯世家若爾三王是有負子之責于天。小司馬云尙書負爲丕。鄭玄讀丕曰負。負

子謂負上天之責也。章懷注非是。王伯厚嘗言之。

齊武王縯傳

建武十五年追諡伯升爲齊武王。按北海王興傳亦云十五年追諡仲爲魯哀王。然考之本紀建武十五年四月癸丑追諡兄伯升爲齊武公。兄仲爲魯哀公。諡號雖同而王公爵異。以情事推之。是歲封皇子十人皆爲公。又前二年降封趙齊魯三王爲公。則追諡兩兄亦必以公爵明矣。至十七年皇子封公者皆進爲王。十九年又進趙齊魯三國公爲王。然後伯升與仲皆追稱爲王耳。二傳所書蓋未得其實。趙王良傳

十三年降爲趙公。十七年薨於京師。子節王栩嗣。按光武紀建武十七年正月趙公良薨。十九年四月進趙齊魯三國公爵爲王。是栩初襲公爵。又二年始進爲王。史於降封公之後。卽書節王栩嗣。文雖簡而意不貫。

子獻王赦嗣。按趙王赦以建安十六年薨。而阜陵王赦亦以建安中薨。此二王同時同名。法事之可疑者。

城陽恭王祉傳

封於零道之舂陵鄉。前志續志俱作冷道。

泗水王歙傳

更封茂爲穰侯。光武紀茂封單父侯。

來歙傳

以歙有平羌隴之功。故改汝南之當鄉縣爲征羌國焉。按汝南郡無當鄉縣。縣字疑衍。水經注征羌縣故召陵縣之安陵鄉安陵亭也。

鄧禹傳

五品不訓。史記五帝本紀作五品不馴。正義讀馴爲訓。周禮地官有土訓。鄭司農讀訓爲馴。馴訓古通用。訓者順也。與遜義亦同。劉愷傳。調訓五品。周舉傳。五品不訓。責在司徒。謝夷吾傳。下使五品咸訓於嘉時。

馮異傳

又降匈奴于林闐頓王。注山陽公載記。頓字作確。前書音義闐音蹋。頓音確。按頓確聲相近。說文無闐字。當是闐字之譌。三國志作蹋頓。

橫被四表。昭假上下。橫被卽書光被也。漢書王莽傳。昔唐堯橫被四表。無以加之。王褒傳。化溢四表。橫被無窮。班固西都賦亦云橫被六合。蓋堯典光被字。漢儒傳授本作橫矣。釋言。枕。頰充也。枕卽橫字。古文充爲芟。與黃相似。故橫或爲枕。孔傳出于魏晉之間。堯典橫已作光。而訓光爲充。猶存古義。後世因作光輝解。失漢儒之本旨矣。

賈復傳

食郁秩壯武下密卽墨挺胡觀陽凡六縣注六縣皆屬膠東國漢志膠東國有挺縣無挺胡縣胡字疑衍。

吳漢傳

分漢封爲三國按吳漢封廣平侯食廣平斥章曲周廣年四縣此所封乃汝南之濯陽新蔡南陽之筑陽與廣平遠不相涉何云分漢封爲三國乎或後來徙封汝南而范史失載耳。

臧宮傳

公孫述將延岑盛兵于沅水注沅水出廣漢解見光武紀按光武紀建武十一年臧宮與公孫述將延岑戰于沅水注引水經注沅水出廣漢縣下入涪水本或作沅水及沅水者竝非則此沅字乃沈之譌。

耿弇傳

至浚靡而還前志續志俱作俊靡。

封牟平侯此封況子舒爲牟平侯而況之封險靡如故也史有脫文耳。

寶女弟爲清河孝王妃及安帝立尊孝王母爲孝德皇后以妃爲甘園大貴人按安帝紀建光元年追尊皇考清河孝王曰孝德皇皇妣左氏曰孝德皇后祖妣宋貴人曰敬隱皇后又追尊孝德皇元妃耿

氏爲甘陵大貴人。此傳以孝德皇后爲孝王之母，誤矣。甘園、甘陵之園也。

耿國傳

建武二十七年，代馮勤爲大司馬。按光武紀，是年五月，改大司馬爲太尉，驃騎大將軍行大司馬劉隆即日罷，以太僕趙意爲太尉。大司農馮勤爲司徒，則是建武廿七年以後，不復置大司馬，而馮勤亦未嘗任大司馬，安得以耿國代之乎？此大司馬當是大司農之譌。蓋勤旣遷司徒，其大司農缺以國代之耳。

銚期傳

攻拔樂陽、橐。注：樂陽，縣名，屬常山郡。今恆州橐城縣也。注：常山郡下脫橐字。班志本作橐城，此云橐者，省文也。郡國志無此三縣，蓋建武中并省。

邳彤傳

萬封重平侯，綏封平臺侯。注：重平縣屬渤海郡，平臺縣屬常山郡。此注據前志。郡國志無此二縣，蓋建武後并省。王懋竑云：平臺前志屬濟南，注屬常山，誤。予謂濟南郡只有臺縣，無平臺縣。漢書刊本誤以鄒平之平連下臺字，後人因讀爲平臺耳。章懷之說不可易也。

耿純傳

與緜曼賊交通。注：綿曼故城在今恆州石邑縣西北。俗音譌謂之人文故城也。古者文如岷，與曼聲相近。

宿至代郡太守，封遂鄉侯。寒朗傳有隧鄉侯耿建，蓋卽宿之後。

馬成傳

建武九年，代來歙守中郎將，率武威將軍劉尚等破河池。遂平武都。明年，大司空李通罷，以成行大司空事。按：光武紀，馬成平武都，在建武十一年，其行大司空事，在十二年，與傳異。

馬武傳

世祖擊尤來五幡等，敗於慎水。按：光武紀作順水。注本或作慎水者，誤。定封爲揚虛侯。注：不言揚虛所在。按：漢書齊悼惠王子將閭封揚虛侯。

竇融傳

金城太守庫鈞。按：下文云：以庫鈞爲金城太守，則此時未爲太守，疑亦是都尉也。融長子穆尚內黃公主。內黃公主不見於皇后紀，疑諸王女。

馬援傳

良工不示人以朴。朴，古璞字，木皮爲朴，故玉之皮亦曰朴。鼠朴與玉璞本非異文也。說文無璞字。

夏爲援制都布單衣。注東觀記都作答。都答聲相近。

前披輿地圖。見天下郡國百有六所。按班史地理志郡國百有三。此據平帝元始之籍也。今云百有六所。豈王莽以後又有增置乎。

以扶樂侯劉隆爲副。注扶樂縣名。屬九真郡。按陳國有扶樂縣。隆封國當在此。未必遠至九真也。隆傳云扶樂鄉侯。

魯恭傳

永元十二年。代呂蓋爲司徒。和帝紀在十三年。

經曰。后以施令誥四方。鄭康成易誥作詰。注云。詰止也。此傳云。君以夏至之日。施命令止四方行者。則恭所引易。亦作詰矣。後人據王輔嗣本改爲誥爾。

馮勤傳

由黃門侍郎尙平安公主。注東觀記亦云安平。皇后紀云。由尙平邑公主。紀傳不同。未知孰是。劉放曰。傳作平安。注云安平。必有一誤。然安平是縣名。則安平是矣。予謂平安亦縣名。屬廣陵郡。貢父偶未檢及耳。平安與平邑。只一字之異。未可遽以安平爲是也。

趙熹傳

以熹守簡陽侯相。荊州牧奏熹才任理劇，詔以爲平林侯相。按：簡陽平林二縣，兩漢志皆無之。蓋建武初置，不久卽省，亦未知何人所封也。光武紀注：平林在今隨州隨縣東北。

馮衍傳

饑者毛食。注：案衍集毛字作無，今俗語猶然，或古亦通乎。古音無如模聲，轉爲毛，今荆楚猶有此音。登平陽而懷傷。注：平陽縣名，在今岐州岐山縣西南。按：兩漢三輔無平陽縣，史記秦本紀：寧公徙居平陽。正義云：岐山縣有陽平鄉，鄉內有平陽聚。

郎顛傳

今立春之後，火卦用事，當溫而寒，違反時節。按：鄭康成注稽覽圖云：雜卦九三上六決溫，九三上九微

溫。魏正光立春之後，小過用事，九三上六決溫之卦，故云火卦。麻同

正月三日至乎九日，三公卦也。注：凡卦法，一爲元士，二爲大夫，三爲三公，四爲諸侯，五爲王位，六爲宗廟，分卦直日之法，爻主一日，卽三日九日竝爲三公之卦也。按：注說非也。京氏卦氣直日之法，坎離震兌用事，分至之首，得八十分日之七十三，餘卦皆主六日八十分日之七。郎宗父子世傳六日七分，卽其術也。今以四分術推，陽嘉二年前十一月甲戌朔，二十九日壬寅冬至，坎卦用事，次日癸卯十二月朔也。自癸卯至戊申，中孚卦用事，己酉至甲寅，復卦用事，乙卯至庚申，屯卦用事，辛酉至丙寅，謙卦

用事。丁卯至壬申。睽卦用事。癸酉至戊寅。升卦用事。癸酉閏十二月朔日也。己卯至甲申。臨卦用事。乙酉至庚寅。小過卦用事。辛卯至丙申。蒙卦用事。丁酉至癸卯。益卦用事。丁酉至壬寅六日。又歲前冬至之二十也。則坎卦用事。已侵次日十三分。而自中孚用事以來。甲辰至己酉。漸卦用事。漸主正月。三公餘分所積。又七十分。故益卦用事。盡癸卯日。而尚有贏分也。甲辰至己酉。漸卦用事。漸主正月。三公之卦也。是歲正月壬寅朔。甲辰爲月之三日。甲辰至己酉。盡六日。而尚有餘分。故云正月三日至九日。三公卦也。自正月九日至二月九日。泰需隨晉解五卦更代用事。而及於大壯。故顛再上書言。今月九日至十四日。大壯用事。今月謂二月也。

今月十七日戊午。徵日也。納音之法。戊午屬火。於五音爲徵。故以戊午爲徵日。

易中孚傳曰。陽感天不旋日。此易稽覽圖之文也。其書首言甲子卦氣起中孚。故漢儒謂之中孚傳。

臣竊見去年閏十月十七日己丑夜。有白氣從西方天苑。趨左足入玉井。數日乃滅。按。顛上便宜七事。

在陽嘉二年。順帝紀。陽嘉元年閏月戊子。客星出天苑。卽其事也。紀書閏月於十二月之後。則是閏十

二月也。以四分術推之。是歲閏餘十八。閏當在十二月後。其月癸酉朔十七日。恰得己丑。此傳云閏十

月者。誤也。十字蓋衍文。或當云閏十二月。

臣伏惟漢興以來。三百三十九歲。於詩三基。黃祖起亥仲二年。今在戊仲十年。注。基當作基。謂以三基之

法推之也。按。詩三基者。蓋詩汜麻樞之別名。猶稽覽圖稱中孚傳也。其法蓋以三百六十歲爲一周。

十二辰各三十年。一辰又別爲孟仲季各十年。故下云戊仲已竟。來年入季也。

襄楷傳

平原隰陰人也。注隰陰縣在隰水之南。故城在今齊州臨邑縣西。隰當作濕。郡國志平原郡有濕陰縣。濕他合反。卽潔水也。班志作潔陰。按說文濟潔字本作濕。隸省作濕。燥濕字本作溼。後世借濕爲燥溼字。而以潔爲水名。不知潔爲濕之譌也。其正作濕者。多與隰相亂。左氏哀十年傳注。濟南有隰陰縣。陸德明誤音習。

梁統傳

更封高山侯。高山縣名。屬臨淮郡。

曹褒傳

父充。持慶氏禮。持本是治字。章懷避諱改之。隗囂傳。申屠剛杜林爲持書。杜林傳。爲持書。平來歷傳。持書侍御史龔調。蔡邕傳注。太伯端委以持周禮。皆本治字。而唐人改爲持也。邳惲傳。理韓詩。嚴氏春秋。則治經之治。或改爲持。或改爲理。初無一定。若侯霸傳。治穀梁春秋。吳良傳。又治尙書。此又校書者轉改。

鄭康成傳

初中興之後。范升、陳元、李育、賈逵之徒。爭論古今學。古學謂左氏春秋。今學則公穀二家也。范升、李育

主公羊說。陳元、賈逵主左氏說。

門生相與撰。答諸弟子問五經。依論語作鄭志八篇。按隋書經籍志。鄭志十一卷。魏侍中鄭小同撰。

鄭記六卷。鄭玄弟子撰。與此傳不合。考孝經正義云。鄭君卒後。其弟子追論師所著述。及應對時人。謂

之鄭志。鄭之弟子分證門徒。各述所言。更爲問答。編錄其語。謂之鄭記。是鄭志出於諸弟子明矣。鄭氏

門人見於鄭志與鄭記者。有趙商、張逸、劉琰、晁模、田瓊、孫皓、冷剛、任厥、汜閣。一作閣陳鏗、焦氏、崇精、鮑遺、

王權、崇翽、焦喬。疑卽焦氏等。傳惟載河內趙商一人。餘人爵里不可考。

凡玄所注周易、尚書、毛詩、儀禮、禮記、論語、孝經。按蔚宗述康成所注有孝經。而謝承、薛瑩、司馬彪、袁山

松諸家皆無之。隋志但云鄭氏注。舊唐志始實以康成。邢昺孝經疏。謂鄭君弟子作鄭志目錄。記鄭所

注書。不及孝經。趙商作康成碑銘。亦不言注孝經。則非鄭所注審矣。三禮皆康成注。流傳至今。乃本傳

有儀禮、禮記。而無周禮。此轉寫之脫漏。

答臨孝存周禮難。臨孝存名碩。北海人。范史多稱人字。孔融傳。郡人甄子然。臨孝存知名早卒。皆字而

不名。

東萊王基。按魏志。基卒於元帝景元二年。不言年壽若干。而墓碑云年七十二。溯其生年。當在初平元

年庚午。康成以建安五年庚辰卒。其時基僅十一歲。不得在弟子之列。恐范史誤也。基治經常。申鄭而駁王肅。故蔚宗疑爲康成弟子。要是私淑鄭學。非親受業者也。

鄭興傳

乃徵爲太中大夫。按鄭康成注周禮。稱興爲鄭大夫。衆爲鄭司農。興以縣令終。而稱大夫。舉其貴者稱之也。

范升傳

子以人不聞於其父母爲孝。臣以下不非其君父爲忠。按漢書杜鄴對策言。孔子善閔子騫守禮。不苟從親。所行無非理者。故無可聞也。范升說與鄴略同。蓋漢儒相承古義。

陳元傳

卒淵聖獨見之旨。章懷注本避唐諱。改淵爲深。或爲泉。今本諸淵字皆後人回改。如章帝紀。聰明淵塞。諒惟淵體。安帝紀。若墜淵水。陳寔傳。曾是淵軌。劉愷傳。沈重淵懿。文苑傳。椒酒淵流。逸民傳。覆巢竭淵。方術傳。何故敗我濯龍淵。儒林傳。歷神淵。鄭康成傳之國淵。西羌傳之馬文淵。皆是也。

桓郁傳

宗正劉方。宗室之表。善爲詩經。方。平原人。范史無傳。考章帝元和二年詔書。稱襄城令劉方。則其時方

尙爲縣令。至永元四年，由宗正拜司空首尾。裁八年，爾頗怪其遷轉之驟，今觀竇憲疏，乃知方以宗室通經術，故有不次之擢也。

法雄傳

子真，在逸人傳。逸人卽逸民，章懷避諱，改爲人字。後來追改不及徧檢，它傳故或改或否耳。列女王霸妻傳亦云，霸已見逸人傳。趙岐傳，漢有逸人，姓趙名嘉。

班彪傳

扶風安陵人也。班超傳云扶風平陵人，當有一誤。

父稚，哀帝時爲廣平太守。漢書敘傳作廣平相，廣平，諸侯王國，當云相，不當云太守也。

班固傳

表以秦華終南之山，秦華，文選作太華，蔚宗避父諱，如郭林宗、鄭公業名皆作太字。此賦秦華、秦紫、秦清之類，必後人所改。

第五倫傳

臣愚不足採，文章未完。

宋意傳

宋當作宗

擢拜阿陽侯相。按阿陽縣屬漢陽郡，不云侯國，而上黨之陽阿爲侯國，此阿陽或陽阿之譌。

東海王疆傳

建武十九年，封爲東海王。二十八年就國，兼食魯郡，合二十九縣。按郡國志：東海十三城，贛榆本屬琅邪，實十二城，魯國六城并之，止十八縣，而琅邪郡之開陽、臨沂卽邱繒，下邳國之下邳、曲陽、司吾、良成、廣陵郡之海西、泰山郡之南城、費，皆故屬東海，故云二十九縣。使大司空持節護喪事。司空，馮魴也。大字衍。

沛王輔傳

建武十五年，封右馮翊公。光武紀無馮字，中山王焉傳，封左馮翊公，與此傳同，皆衍文也。左翊右翊，蓋取嘉名，非分馮翊地爲左右。

中元二年，封輔子寶爲沛侯。按沛爲王國之名，不應更有沛侯，疑字有譌。

楚王英傳

建武三十年，以臨淮之取慮、須昌二縣益楚國。注：臨淮無須昌，有昌陽縣，蓋誤也。按郡國志無昌陽，蓋順帝時已併省矣。取慮，志仍屬下邳。卽臨淮蓋楚國旣除之後，復其舊也。

濟南王康傳

建武三十年以平原之祝阿、安德、朝陽、平昌、隰陰、重邱六縣益濟南國。朝陽卽東朝陽、平昌卽西平昌。隰蓋濕之譌。續志無重邱縣。蓋後來所省。前志朝陽本屬濟南。不知何時改隸平原也。

東平王蒼傳

永平二年以東郡之壽張、須昌、山陽之南平陽、橐、湖陵五縣益東平國。按郡國志南平陽三縣仍屬山陽。

阜陵王延傳

建武三十年以汝南之長平、西華、新陽、扶桑四縣益淮陽國。注扶桑故城在陳州泰康縣北。扶桑當依

閩本作扶樂。

琅邪王京傳

永平二年以太山之蓋南、武陽、華、東萊之昌陽、盧鄉、東牟六縣益琅邪。按前志泰山郡有華縣。而續志無之。今據此傳則永平之世華縣見在。而三國志稱臧霸爲泰山華人。孔宙碑陰亦有題泰山華者。疑華縣在東漢初未嘗并省。志偶漏此一縣耳。

上書願徙宮開陽。以華蓋、南武陽、厚邱、贛榆五縣。易東海之開陽。臨沂。肅宗許之。此事在建初五年考。前志續志厚邱本屬東海。據此似又嘗改隸琅邪矣。

朱穆傳

丁亥之歲。刑德合於乾位。注。歷法。太歲在丁壬。歲德在北宮。太歲在亥卯未。歲刑亦在北宮。故合於乾位也。按漢書藝文志。刑德七卷。五行奇胾。刑德二十一卷。今皆不傳。淮南天文訓言。刑德合四歲而分。十六歲而復合。刑不得入中宮。而遷於木。則其說自漢初已有之矣。今依其法衍之。甲己之歲。德在東宮。乙庚之歲。德在西宮。丙辛之歲。德在南宮。丁壬之歲。德在北宮。戊癸之歲。德在中宮。故王莽傳云。倉龍癸酉。德在中宮。張純傳云。蒼龍甲寅。德在東宮也。申子辰之歲。刑在東方。子刑卯也。亥卯未之歲。刑在北方。卯刑子也。寅午戌之歲。刑在南方。己酉丑之歲。刑在西方。午酉自刑也。翼氏風角云。金剛火疆。各守其鄉。卽午酉自刑之謂也。又云。二陰竝行。是以王者忌子卯。卽子卯相刑之謂也。蘇竟傳云。德在中宮。刑在木。謂建武四年戊子之歲也。此傳云。丁亥之歲。刑德合於乾位。乾位謂北方也。近則邴吉張子孺。王懋竑曰。張安世不當獨稱字。乃章懷所改也。世皆改作代。而人名不合改。故稱其字。

樂恢傳

成陽高鳳。按逸民傳。高鳳。南陽葉人。此成陽恐是南陽之譌。或別有同姓名者。

袁安傳

伏念南單于屯。本名屯屠何。此單舉上一字。

張酺傳

趙王張敖之後也。敖子壽。封細陽之池陽鄉。史記呂后本紀。壽爲樂昌侯。功臣表作受徐廣云。今細陽之池

陽鄉。蓋本此。漢書功臣表不言樂昌所在。宣帝封舅王武爲樂昌侯。則表繫之汝南。細陽本屬汝南。則武所封。當亦在池陽鄉矣。

周景傳

遂連及中常侍防東陽侯侯覽。劉貢父據覽傳。覽防東人。封高鄉侯。證此文當爲高鄉之誤。是矣。予又

疑高鄉卽防東之鄉。故傳稱爲防東鄉侯。因下文有東武陽字。又誤鄉爲陽也。

郭躬傳

時廷尉河南吳雄季高。按孔廟百石卒史碑。雄河南原武人。

陳寵傳

美鄭喬之仁政。春秋傳。喬作僑。古人名字恆相應。產者。生也。木高曰喬。有生長之義。故名喬。字子產。後

人增加人旁。

先是洛縣城南。洛當作雒。廣漢郡所治。

東平相應順。應順亦汝南人，奉之曾大父也。其爲東平相，遷左馮翊，則奉傳所未及載。

班超傳

焉耆王舜，舜子忠，獨謀悖逆。按明帝紀西域傳不載焉耆王之名，獨見於此詔。

應奉傳

爲郡決曹史，行部四十二縣。按郡國志汝南郡領三十七城，此云四十二，未詳。

應劭傳

靈帝時舉孝廉，辟車騎將軍何苗掾。按風俗通正失篇：子爲蕭令，謁辭故司空宣伯應，考宣、鄩爲司空。

在延熹九年十二月，次年四月免，是劭爲蕭令，在靈帝初，而傳失書。

夫時化則刑重，時亂則刑輕。書曰：刑罰時輕時重，此之謂也。注：犯化之罪固重，犯亂之罪爲輕。按漢書

刑法志：治則刑重，亂則刑輕，犯治之罪固重，犯亂之罪爲輕也。本荀子正論篇此傳及注中化字，本是治字，唐

人諱治，故章懷注范史，多改治爲理，亦有改爲化者。張奮傳：王者化定制禮，功成作樂。曹褒傳：功成作

樂，化定制禮。王符傳：亂生於化，危生於安。化國之日舒以長，亂國之日促以短。仲長統傳：亂世長而化

世短。此世字後人所改君子用法制而至於化，小人用法制而至於亂，或以之化，或以之亂。爰延傳：尙書令陳

蕃任事則化，中常侍黃門預政則亂是也。世皆改爲代，亦有改爲時者。此傳時輕時重是也。

緹縉十重。注。縉音襲。古文襲與習通。士喪禮。綵者以褶。則必有裳。注。古文褶爲襲。

陳王羨傳

遺詔徙封爲陳王。食淮南郡。淮南當作淮陽。和帝紀。改淮陽爲陳國。遺詔徙西平王羨爲陳王。是其證也。淮陽王昞。以章和元年薨。未爲立嗣。故以其地改封羨。參考紀傳。左驗明白。或疑淮當爲汝者。非也。後見嘉靖閩本果作淮陽。私喜予言之不妄。

樂成王黨傳

建初四年。以清河之游。觀津。勃海之東光。成平。涿郡之中水。饒陽。安平。南深澤八縣益樂成國。注。前書及郡國志。游

河無游縣。

按。觀津本屬信都。即樂成。

不知何時改隸清河也。史記外戚世家。竇皇后。清河觀津人。此在信都。

置郡之前。郡國志。中水。成平屬河間。

和帝詔削東。鄔二縣。鄔本屬鉅鹿。不知何時改隸樂成。竊意建初所益八縣。鉅鹿之鄔。當居其一。史

誤以爲清河之游。清河本無游縣也。

下邳王衍傳

建初四年。以臨淮郡及九江之鍾離。當塗。東城。歷陽。全椒。合十七縣益下邳國。按。下邳本東海屬縣。今置爲王國。而以臨淮郡地益之。志稱下邳國十七城。除下邳。曲陽。司吾。良成。夏邱本不屬臨淮。其餘十

二縣并鍾離五縣。正合十七之數。但志所載東成。卽九江之東城。實重出一縣。當併下邳計之。爲十七也。鍾離當塗。歷陽。全椒四縣。志仍屬九江。傳又不見削地事。考漢世王子封侯者。例別屬它郡。鍾離。歷陽。志稱侯國。必王子侯也。其二縣志不言侯國。或分封未幾。而國除爲縣乎。

梁王暢傳

建初四年。徙爲梁王。以陳留之鄆。寧陵。濟陰之薄。單父。己氏。成武。凡六縣益梁國。按前志。己氏本屬梁國。薄。單父。成武。本屬山陽。且濟陰王長亦同時益封。以理揆之。不應奪濟陰以畀梁。恐傳又誤也。郡國志。鄆作隅。此字亦誤。當爲鄆。

淮陽王昞傳

建初四年。徙爲淮陽王。以汝南之新安。西華。益淮陽國。按汝南郡無新安縣。疑新陽之譌也。郡國志。西華仍屬汝南。

濟陰王長傳

建初四年。以東郡之離狐。陳留之長垣。益濟陰國。郡國志。長垣仍屬陳留。

陳禪傳

州辟治中從事。注續漢志曰。每州有治中從事。按章懷避唐諱。凡治字。或改爲理。或改爲化。或改爲持。

此治中字亦必改易。宋人校書者又回改耳。袁紹傳以審配爲治中。又有治中劉惠。故詩云以雅以南。韎任朱離。注毛詩無韎任朱離之文。蓋見齊魯之詩也。予謂韎任句上下當有脫文。未必詩有此語。

廿二史考異卷十二

後漢書三

崔駟傳

涿郡安平人。安平縣本屬涿。章帝建初四年改隸樂成國。順帝改樂成國爲安平。因縣以名也。桓靈之世。安平改隸博陵郡。故孔彪碑陰故吏名有博陵安平崔烈。而程夫人亦稱烈爲冀州名士也。涿郡屬幽州。樂成博陵則屬冀州。

犯孔戒之治容。注。易繫辭曰。治容誨淫。鄭玄云。謂飾其容而見於外曰治。治容。鄭本作野容。故有見於外之訓。

貴啟體之歸全兮。庶不忝乎先子。案。崔宗仕莽顯貴。篆亦至二十石。已昧守貞之誼。漢室中興。正當匡時。以蓋前愆。乃更辭歸不仕。去就偵倒如此。而云無忝先子。何顏之厚乎。此傳敘述家世。詞多溢美。蓋由東觀諸臣阿其所好。蔚宗承其舊文。可加芟削。未爲有識也。東觀記儒林傳有崔篆。乃元嘉初。增入時。崔寔爲史官。卽篆元孫也。當其無事。則躡纓整襟。注。躡。踐也。此字宜從手。廣雅云。躡。持也。史記曰。攝纓整襟。案。說文。攬。理持也。字宜從手。不從足。史記日者傳本作獵纓正襟。獵亦攬之譌。此作攝者。因下文相涉而誤。

吾亦笑子屑屑而巳也。注：屑屑猶區區也。案：王良傳：往來屑屑不憚煩也。注引方言之：屑屑不安也。

二注互異，當以彼注爲是。

豈可不庶幾夙夜，以永衆譽。古音衆如終。春秋傳：衆父卒。釋文：音終。葛本改作終非。

周燮傳

荀恁字君大。案：劉平傳：數薦達名士承宮、郇恁等。卽此荀恁也。說文無荀字，當以郇爲正。恁父越，見漢

書鮑宣傳，亦作郇。

蓋詭時審己以成其道焉。注：詭，違也。案：中庸云：君子之道費而隱。鄭氏注言：可隱之節也。費猶儉也。道

不費則仕，儉與詭同。費本又作拂，拂亦訓違。此序云：詭時審己以成其道。卽記所謂君子之道費而隱

也。馮衍傳：詭於衆意。注亦訓詭爲違。

常肆勤以自給。注：肆，陳也。肆當爲肄字之譌。

黃憲傳

余曾祖穆侯。案：范甯撰穀梁集解，往往采其先人及兄弟子姪之說。蔚宗作史，亦舉曾祖穆侯。注：王父

豫章君甯，先大夫宣侯。案

楊秉傳

中常侍單超弟匡。案弟五種傳以匡爲超兄子。宦者傳以爲超弟子。

楊賜傳

熹平二年代唐珍爲司空。案靈帝紀熹平二年正月司空宗俱薨。二月以光祿勳楊賜爲司空。七月司空楊賜免。太常唐珍爲司空。是賜代宗俱而珍代賜也。傳誤。

以問侍中任芝。中常侍樂松。案中常侍惟宦者爲之。樂松初爲鴻都文學。見酷吏陽球傳繼爲侍中祭酒。見蔡邕傳

又爲奉車都尉。見劉陶傳皆非宦者之職。賜前上書言樂松處常伯。漢人稱侍中爲常伯。則松官侍中明矣。

此云中常侍誤也。

濟北王壽傳

永和四年立戰鄉侯安國爲濟北王。和帝紀封故濟北王壽子安爲濟北王。無國字。

河閒王開傳

永寧元年鄧太后封開子翼爲平原王。奉懷王勝祀。子德爲安平王。奉樂成王黨祀。案安帝紀是年與平原王同封者。乃濟北王壽之子樂成王萇也。其明年爲建光元年。鄧太后崩。樂成王萇亦以罪廢。又明年爲延光元年。始改樂成國爲安平。封河閒王開子得爲王。得與德本一人也。此傳蓋有脫文。

熹平三年使使拜河閒安王子康爲濟南王。案光武子有濟南安王康。此濟南王亦名康。先後同國。

同名亦可疑也。御覽引續漢書此濟南王名庚。

張皓傳

時清河趙騰上言災變譏刺朝政章下有司收騰繫考案楊震傳河閒男子趙騰詣闕上書指陳得失帝怒收考詔獄震上疏救之帝不省騰竟伏尸都市此安帝延光二年事也皓爲司空在順帝永建元年冬又有趙騰以言事獲咎因皓上疏諫得減死一等相距僅三四載姓名又相同疑一事而傳聞異詞也。

王暢傳

聞伯夷之風者貪夫廉懦夫有立志此語見孟子今本貪作頑貪與廉相反當從貪爲是。丁鴻傳論亦同

种劭傳

及左中郎劉範諫議大夫馬宇董卓傳云侍中馬宇右中郎將劉範

劉陶傳

武旅有鳧藻之士注武旅周武王之旅鳧得水藻言喜悅也案今文太誓云師乃鼓鼗諫師乃摺前歌後舞鳧藻卽鼗諫文異義同也杜詩傳將帥和睦士卒鳧藻亦用斯語章懷知其爲武王事而不引太誓以實之

謝弼傳

建寧二年。一本作三年詔舉有道之士。弼與東海陳敦、玄菟公孫度俱對策。案靈帝紀建寧元年五月詔郡

國守相舉有道之士各一人。二年當是元年之誤。

時青蛇見前殿。五行志熹平元年四月甲午青蛇見御坐上。楊賜傳亦作熹平以弼封事證之。當是建寧元年。

非熹平也。

又熒惑守亢。天文志不載此事。

今之四公。唯司空劉寵斷斷守善。餘皆素餐致寇之人。注四公謂劉矩爲太尉、許訓爲司徒、胡廣爲太傅、及寵也。案劉寵爲司空。在建寧元年。注所舉太尉劉矩亦以元年十一月免官。似章懷本元是建寧元年。非二年矣。惟許訓爲司徒。與本紀未合。

蓋勳傳

昔莊賈後期。穰苴奮劍。案東漢人避明帝諱。改莊爲嚴。此稱莊賈。董卓傳亦有穰苴斬莊賈之語。明帝紀楚莊無災。以致戒懼。皆後來校書者不學輒改之也。西南夷傳楚頃襄王時遣將莊豪。又云滇王者莊躄之後。西羌傳魯莊公伐秦。此蔚宗敘事之詞。故不避漢諱。

張衡傳

祖父堪、蜀郡太守。案張堪在列傳第二十一卷。彼云南陽宛人。此云南陽西鄂人。縣名小異耳。何卮瞻

謂別一張堪。非是。朱暉傳稱同縣張堪。暉亦宛人也。

不見是而不悟。注。惛猶悶也。惛悶聲相近。

繡幽蘭之秋華兮。說文。繡。維綱中繩也。讀若畫。又讀若維。諸家讀爲戶珪反者是也。章懷讀爲纂。則文

當從雋考。說文有繡無繡。章懷音誤矣。

羈要裊以服箱。劉放曰。案。要。裊。古良馬。當作要。從馬。案。要。裊之名。本取疊韻。劉必改從馬。則要亦當作

騷。所謂泥俗而不通於古也。文選。羈作繫。

愁蔚蔚以慕遠兮。文選作鬱鬱。

顓羈旅而無友兮。注。顓。獨也。顓與塊聲相近。說文。顓。讀若魁。

馬融傳

詩詠囿草。注。韓詩曰。東有囿草。囿當從閩本作圃。詩。東有甫草。鄭氏讀如圃。

其土毛則推牧薦草。注。推牧未詳。推蓋與菴同。爾雅。菴。山韭是也。牧。菽菹也。

陳子籌昏。注。陳子。陳平。善於籌策也。陳子。古之善算者。周髀經云。榮方問于陳子。是也。章懷以爲陳平

誤矣。

旃旒摻其如林。說文旃建大木置石其上發以機以追敵也。詩曰其旃如林。季長所見本與叔重同。

獄鬻熊。注鬻亦狂也。鬻當作獠。

天地虹洞。注虹洞相連也。虹洞與鴻洞同。

駭恫底伏。注底伏猶滯伏也。春秋傳物乃坻伏。鬻湮不育。注坻止也。坻與底同。

族孫日礪。案三輔決錄云馬融族子。見袁紹孔融傳注。

蔡邕傳

出補河平長。郡國志無河平縣。

宣王遭旱密勿祇畏。案雲漢之詩云黽勉畏去。劉向引詩黽勉從事。作密勿從事。向世習魯詩。知魯詩

黽勉字皆作密勿矣。伯喈封事蓋用雲漢詩文而章懷不能注也。胡廣傳密勿夙夜傳毅傳密勿朝夕謝夷吾傳密勿在公。

今者道路紛紛復云有程大人者。案陳球傳云陽球小妻程璜之女璜用事宮中。所謂程大人也。漢時

宮人中耆宿皆稱中大人。見鄧禹傳。韋昭云古者名男子爲丈夫尊父嫗爲大人。故宮婢亦有大人之稱。崔

烈因傳母入錢得爲司徒。烈傳所云程夫人疑卽此人。

叔父衛尉質又與將作大匠楊球有隙。球卽中常侍程璜女夫也。楊當作陽。據陳球傳則程璜卽程大

人。乃是女子。此傳云中常侍則是宦者非婦人矣。未審誰得其實。

左雄傳

褻豔用權注。褻豔謂褻媼也。豔美色也。案章懷注用毛氏說。鄭康成則以豔妻爲厲王后。謂正月惡褻媼滅周十月之交。疾豔妻煽方處。則褻豔非一人。此疏上言幽厲昏亂。下言褻豔用權。則亦與鄭氏說同。魯詩豔作閻。尙書中候作剡閻。剡豔文異實同。蓋其女族姓。非訓美色也。漢成帝時。谷永對策云。昔褻媼用國。宗周以喪。閻妻驕扇。日以不臧。兩漢經師皆主此說。故康成從之。

或色斯以求名。此用論語以色斯當遠舉之義。二國志崔琰傳。哲人君子。俄有色斯之志。漢張壽碑。常懷色斯。元賓碑。翻響色斯。鄭固碑。將從雅意。色斯自得。斥彰。長田君碑。色斯去官。抱朴子外篇。或色斯而不終日。蓋漢魏人用歇後語多如此。

周舉傳

延熹四年。辟司徒李郃府。延熹當作延光。

黃琬傳

出爲魯東海二郡相。案漢制。諸侯王國稱相。郡稱太守。此郡當爲國之誤。

荀淑傳

有子八人。儉。緄。靖。燾。汪。爽。肅。專。專當作尊。卽敷字。陶淵明四八目云。儉字伯慈。緄字仲慈。靖字叔慈。燾

字慈光。汪字孟慈。爽字慈明。肅字敬慈。尊字幼慈。見張璠漢紀。

荀爽傳

行至宛陵。宛與苑同。此河南之宛陵。非丹陽之宛陵。

陳寔傳

字仲弓。洪氏隸續載陳寔碑云字仲躬。

中平四年。年八十四。卒于家。碑云春秋八十三。中平三年卒。

李固傳

司徒郃之子也。郃在數術傳。數術當作方術。

吳祐傳

所謂觀過斯知人矣。今本論語人作仁。古書仁人二字多通用。然以人義爲長。

延篤傳

爲平陽侯相。此山陽之南平陽。非河東之平陽。

孝悌也者。其爲人之本與。此據葛氏本。諸本皆作仁。今本論語人作仁。案初學記友悌部。太平御覽人事部引論語。

俱云其爲人之本與。有子先言其爲人也。孝弟後言其爲人之本。首尾相應。亦當以人爲長也。

史弼傳

陛下降於友于。案袁紹傳亦云友于之性。生於自然。六朝人好用此語。三國志陳思王植傳。今之否隔。友于同憂。吳三嗣主傳。友于之義薄矣。許靖傳注。處室則友于不穆。晉書長沙王乂傳。友于十人同產。皇室東萊王蕤傳。曾無友于之情。王渾傳。虧友于款篤之義。傅咸傳。無友于之情。李友傳。論篤友于而宣範。宋書廬江王禕傳。克敦友于。桂陽王休範傳。先帝穆於友于。范泰傳。孝慈天至。友于過隆。南齊書豫章王嶷傳。友于之愛。垂友于之性。朕友于之深。王思遠傳。友于甚至。梁書陳伯之傳。朱鮪涉血於友于。南史齊文惠太子傳。太子見上友于既至。梁臨川王宏傳。武帝於友于甚厚。袁象傳。辨讞之日。友于讓生。北史李順傳。篤穆友于。見稱於世。李謐傳。幼事兄瑒。恭順盡友于之誠。薛聰傳。友于篤穆。房彥謙傳。上副聖主友于之意。要皆濫觴於後漢也。

盧植傳

將有楚人脅比尹氏立朝之變。公羊傳。靈王作乾谿之臺。三年不成。楚公子棄疾脅比而立之。章懷注。不引公羊。而引左氏周走而呼云云。非植意也。

皇甫規傳

自以連在大位。欲退身避第。第當作弟。避弟謂已避位。而弟得辟召也。此事見風俗通過譽篇。下文避

第仕塗亦弟字之譌。章懷注謂欲歸第避仕宦之塗誤矣。

張奐傳

敦煌酒泉人也。注。酒泉縣名。地多泉水。今永州晉昌縣東北。閩本永作陽。考唐書地理志晉昌縣屬瓜州。永陽二字俱誤。案。酒泉郡

名。非縣名。當作淵泉。胡三省注通鑑云。奐。敦煌淵泉人。胡所見本尙未譌也。漢志敦煌郡有淵泉縣。晉志作深泉。蓋避唐諱。章懷本亦當作深。後人妄改爲酒耳。郡國志作拼泉。拼亦淵字之譌。

陳蕃傳

車駕幸廣城校獵。注。廣城苑名。在今汝州梁縣西。城當作成。馬融上廣成頌。卽此。

齊景公欲觀于海。放乎琅邪。晏子爲陳百姓惡聞旌旗輿馬之音。舉首嚟眉之感。此誤以孟子對齊宣

王語爲晏子之言。

黨錮傳

郭林宗、賈偉節爲其冠。案。何顛傳亦云郭林宗、賈偉節等。蔚宗避家諱。故郭泰不書名。并偉節亦字之。

岑暉傳。郭林宗、朱公叔等皆爲友。亦因郭而及朱也。

范康。荀淑、竇武傳並作苑康。

張儉。外黃令毛欽。胡三省曰。外黃縣屬陳留郡。黃縣屬東萊郡。毛欽蓋爲黃縣令。外字衍。

郭太傳

初太始至南州。過袁奉高。不宿而去。從叔度累日不去。或以問太。太曰。奉高之器。譬之泛濫。雖清而易挹。叔度之器。汪汪若干頃之陂。澄之不清。撓之不濁。不可量也。已而果然。太以是名聞天下。予初讀此傳。至此數行。疑其詞句不倫。蔚宗避其父名。篇中前後皆稱林宗。卽它傳亦然。此獨書其名。一疑也。且其事已載黃憲傳。不當重出。二疑也。叔度書字而不書姓。三疑也。前云於是名震京師。此又云以是名聞天下。詞意重沓。四疑也。後得閩中舊本。乃知此七十四字。本章懷注引謝承書之文。叔度不書姓者。蒙上入汝南則交黃叔度而言也。今本皆僂入正文。惟閩本猶不失其舊。閩本係明嘉靖己酉歲按察使周采等校刊。其源出於宋刻。較之它本爲善。如左原以下十人。附書林宗傳末。今本各自跳行。閩本獨否。泛濫黃憲傳作汎濫。謂汎泉濫泉也。此作汎。譌。

孔融傳

故發辭偏宕。說文宕。過也。

荀彧傳

朗陵令淑之孫也。荀淑傳補朗陵侯相。漢制縣爲侯國。則置侯相一人治之。其職與令長同。故亦通稱爲令也。東萊之不其亦侯國。而董恢傳稱除不其令。

明年又爲操鎮東司馬。此初平二年之明年也。據魏志操爲鎮東將軍。在建安元年。則初平三年安得便稱鎮東司馬乎。魏志彧傳本云。明年太祖領兗州牧。後爲鎮東將軍。常以司馬從。然則領兗州在此年。而除鎮東司馬。不在此年也。范史刪去領兗州句。遂誤以鎮東司馬爲是年事矣。

將軍本以兗州首事。故能平定山東。此實天下之要地。而將軍之關河也。案魏志彧傳云。河濟天下之要地也。今雖殘壞。猶易以自保。是亦將軍之關中河內也。蓋上言高祖保關中。光武據河內。皆深根本。以制天下。故以兗州比關中河內。范史刪去二字。未當。

袁紹旣兼河朔之地。有驕氣。而操敗于張繡。紹與操書甚倨。注陳琳爲紹作檄書云云。案傳云紹與操書。注以檄書當之。誤矣。操爲張繡所敗。在建安二年。而紹宣檄乃在建安五年。亦不相涉。

皇甫嵩傳

徵爲議郎。遷北地太守。按下文靈帝召羣臣會議。嵩亦與焉。似無出守事。或已遷而未之官耶。

朱儁傳

博士鄭玄等。是時康成避地徐州。陶謙以師友待之。故與謙同列名。中平五年。康成與荀爽韓融等竝以博士徵。雖未就職。猶以博士稱之也。

董卓傳

乃任吏部尚書漢陽周珌。王懋竑曰：漢時尚書六曹，止稱尚書，不以曹名官也。吏部則東漢初無此稱。此范史之誤。予案：靈帝末，梁鵠爲選部尚書，見續漢百官志注。而蜀志許靖傳亦云：以漢陽周毖爲吏部尚書，似漢末已有吏部之稱矣。章懷注引英雄記云：周毖，武威人。此與蜀志俱云漢陽，未知孰是。殺衛尉种拂等。案：獻帝紀种拂傳皆云太常，非衛尉也。四年，張楊爲將楊醜所殺。案：獻帝紀在三年十二月。

劉虞傳

前中山相張純、南匈奴、烏桓傳俱作前中山太守。

公孫瓚傳

齊桓立柯會之盟。

會當作亭。典略本作亭。

陶謙傳

初曹操父嵩避難琅邪時，謙別將守陰平，利嵩財寶，遂襲殺之。案：應劭傳謂謙素怨嵩，子操數擊之，乃使輕騎追嵩殺之。二說互異，當以謙傳爲正。操欲吞併徐部，文致謙罪，以爲出兵之名耳。韋曜吳書謂歸咎於陶謙者得之。

袁紹傳

父成、五官中郎將。華嶠漢書作左中郎將。見三國志注。袁安傳云左中郎似失之。

除濮陽長。許劭傳稱紹爲濮陽令。

少府陰循、執金吾胡母班、將作大匠吳循。獻帝紀、循皆作脩。魏志亦作吳脩。當以脩爲正。

操姦闔遺醜。姦當作贅。漢書如淳注、淮南俗、賣子與人作奴婢、名曰贅子。操父嵩本夏侯氏、爲中常侍

曹騰養子、故云贅也。三國志注及文選竝是贅字。

劉表傳

荊州八郡可傳檄而定。注、漢官儀曰、荊州管長沙、零陵、桂陽、南陽、江夏、武陵、南郡、章陵等是也。案、郡國

志無章陵郡。蓋漢末所增置。禰衡傳、黃祖子射爲章陵太守。三國志、太祖征荊州、以趙儼領章陵太守。

又劉表將有章陵太守蒯越是也。水經注、安昌縣故蔡陽之白水鄉也。漢元帝以長沙卑溼、分白水上

唐二鄉爲春陵縣。光武卽帝位、改爲章陵縣。魏黃初二年、更從今名。故義陽郡治也。章懷太子云春陵故城在今隨州棗

陽縣東。魏志彭城王據傳、黃初二年、爲章陵王。其年徙封義陽。依酈氏說、則義陽卽漢末之章陵郡。非有

兩地矣。但酈所云安昌縣、爲漢蔡陽縣地。而漢之義陽侯國、則平氏縣地。魏初置義陽縣、卽因漢侯國

之舊。雖均屬南陽郡、而相距且數百里。究難溷而而爲一。竊意黃初置義陽國、雖取義陽縣爲名、而治

所實在安昌。卽章陵郡故治。但魏文多忌諱、惡章陵之名、置不用耳。至晉泰始初、封義陽王望、乃徙治

義陽縣。

劉焉傳

并州刺史張懿。蜀志劉二牧傳作張益。

遂就拜魯鎮夷中郎將。領漢寧太守。注袁山松書。建安二十年。置漢寧郡。案曹公破張魯。在建安二十年。而魯領漢寧太守。乃在其前。則漢寧之名。由來已久。大率劉焉父子所表授耳。山松書蓋據曹公破漢中之歲書之。魏志建安二十年。復漢寧郡爲漢中。蓋得其實矣。

袁術傳

遂果僭號。自稱仲家。注仲或作沖。沖家猶沖人。沖子也。當以沖爲是。

循吏傳

劉矩。叔父光。順帝時爲司徒。案順帝紀。永建二年七月。太常劉光爲太尉。四年八月免。未嘗爲司徒也。

以叔父遼未得仕進。當云父叔遼。傳寫偵倒耳。見風俗通十反篇。

劉寵。弟方。官至山陽太守。此別一劉方。

仇覽。時考城人。河內王渙。渙當作免。河內武德人。見范丹傳。非廣漢之王渙也。

周紆常築塹以自給。劉放曰：塹非築所成，當作塹。說文：塹，瓠適也。洪氏隸續有永初官塹文。云眉州人掘武陽故城，時或得之。傳云築塹者，以塹築城垣也。劉貢父破為塹，非是。

陽球案：松覽等皆出於微蔑。微蔑猶言微末也。

爾前事吾父子如奴。闕本，事上奴敢反汝主乎。案：陽球誅王甫輩，雖快人意，然球本中常侍程璜女夫。

又以私憾蔡質，道飛章陷質邕父子。王萌所云事吾父子如奴，殆非誣也。傳曰：無瑕者可以戮人。

宦者傳

皆剝割萌黎。萌與氓通。

孫程：李元為褻信侯，楊佗為山都侯。注：褻信，山都竝屬南陽郡。按：郡國志：褻信屬汝南，不屬南陽。

單超：故汝南太守下邳李暠。此與蘇不韋傳之李暠同時。又同姓名。

時下邳縣屬東海。案：郡國志：下邳國十七城，其一曰下邳，故屬東海。凡縣名先書者，為郡所治，則下邳

縣乃王都所在矣。下邳王衍以永平十五年封傳國三世。至建安十一年國除，超傳載徐宣為下邳令。

黃浮為東海相，則桓帝延熹中也。豈其時下邳王已徙都它邑，而以縣仍屬東海乎。

曹節：越騎營五百妻有美色。輿服志謂之伍伯。補衡傳：令五百將出，欲加箠。

呂強。汝陽李巡。巡官中黃門。卽注爾雅者。

張讓。發太原河東狄道諸郡材木。狄道非郡名。當云隴西。

論。三世以嬖色取禍。注夏以末嬉殷以妲己。周以褒似。三世當爲三代。章懷注范史。凡世字皆改爲

代。以避唐諱。宋以後校書者復改正之。此三代字。蔚宗本文。校書者不知而妄改。

儒林傳上

乃更修鬻字。注說文曰。鬻。學也。案說文無此文。徐鉉以鬻爲俗書。

歐陽歙。樂安千乘人也。案和帝永元七年。始置樂安國。歙卒於光武之世。當稱千乘人。前書歐陽和伯千乘人。

牟長卒。章帝朝。而傳稱樂安臨濟人。皆史臣追書。

孔僖。世祖復封均子志爲褒成侯。志卒。子損嗣。永元四年。徙封褒亭侯。案孔龢碑載。元嘉三年。司徒

雄等奏稱。褒成侯四時來祠。又韓敕碑陰有褒成侯孔建壽名。碑立于永壽二年。洪适疑建壽卽損之

字。又據安帝紀。延光三年。賜褒成侯帛。及二碑俱稱褒成。以證損未嘗徙封。其說當矣。考郡國志無褒

成侯國。則褒成之封。當是亭侯。非縣侯。史例當書褒成亭侯。或偶脫成字。蔚宗因誤以爲徙封褒亭爾。

魏文帝黃初二年詔。亦稱褒成之後。絕而莫繼。

薛漢。會稽澹臺敬伯。今吳縣南有澹臺湖。蓋以姓得名。建武永平之際。吳地尙屬會稽也。

何休。蕃敗。休坐廢錮。乃作春秋公羊解詁。覃思不闕。門十有七年。案陳蕃事敗。在建寧元年九月。是歲歲在戊申。而休卒於光和五年壬戌。首尾僅十有五載。而晚年又應公府之辟。歷官議郎。諫議大夫。則著書杜門。大約不過十年耳。光和二年。以上祿長和海言。令黨人禁錮小功以下皆除之。傳所謂黨禁解者。當在此時。至中平元年。大赦天下黨人。則休已先卒矣。

許慎。少博學經籍。案慎子冲上說文表。云慎本從賈逵受古學。

爲郡功曹。舉孝廉。再遷除。長卒于家。冲表稱臣父故太尉南閣祭酒。傳失書。冲上表在安帝建光元年九月。其時慎已病。當卒於安帝之末也。

文苑傳上

杜篤。癰。偃。西戎。偃與闕同。癰。偃。猶。壅。遏。也。

蓋夫燔柴。剗蛇。注。剗。之。竟。反。剗。古。斷。字。

劉珍。又撰釋名三十篇。以辨萬物之稱號云。案隋書經籍志。釋名八卷。劉熙撰。直齋書錄解題。亦云。

釋名八卷。漢徵士北海劉熙成國撰。凡二十七篇。

文苑傳下

趙壹。榮納由于閃榆。注。閃榆。傾佞之貌。榆音輸。案。閃榆猶言陝輸。曹大家女誡云。動靜輕脫。視聽陝

輸。注。陝輸。不定貌也。集韻作陝揄。揄從手旁。

劉梁。庚桑瑣隸。風移礮礮。礮礮卽畏壘也。史記云。畏累虛亢桑子之屬。皆空語。崔譔注。莊子本作壘。俗作累。又加石旁耳。說文作鏗鏗。

高彪。後遷內黃令。內黃當爲外黃之譌。申屠蟠。陳留外黃人。此云到官上書薦縣人申屠蟠等。可證

其非內黃也。洪氏隸釋有外黃令高彪碑。

禰衡。激楚揚阿。至妙之容。臺牧者之所貪。注。臺牧未詳其義。融集作堂牧。文選載此表作掌技。

獨行傳

劉茂。時小吏所輔。注。所。姓也。風俗通曰。宋大夫華所事之後。案。左氏傳有華御事。未見名所事者。春

秋。隱九年。俠卒。穀梁云。所俠也。

彭脩。會稽毗陵人。案。毗陵。順帝時析屬吳郡。脩與鍾離意同時。其時未置吳郡。張武。吳郡由拳人。高

彪。吳郡無錫人。則皆在分郡以後矣。陸續稱會稽吳人。其孫康稱吳郡吳人。續仕明帝之世。康在靈帝

時也。

陳重。少與同郡雷義爲友。按。袁敞傳言。尙書郎朱濟。丁盛。立行不脩。張俊欲舉奏之。二人恐。因陳重

雷義往請俊。俊不聽。因其私賂侍史。使求俊短。得其私書。封上之。雷陳雖以善交稱。然與儉人爲朋。私相請託。難免比匪之傷矣。

方術傳

是以通儒碩生。忿其姦妄不經。奏議慷慨。以爲宜見藏擯。注。謂桓譚、賈逵、張衡之流也。案。賈逵傳會圖識。具見本傳。此序亦云。逵以附同稱顯。注。乃以逵與桓譚、張衡竝稱。誤矣。

許楊。汝南舊有鴻郤陂。漢書作鴻隙。隙與郤同。

高獲。遂遠遁江南。卒于石城。注。石城在今蘇州西南。案。石城縣名。屬丹陽郡。此注恐誤。

方術傳下

董扶。諸葛亮問廣漢秦密。蜀志。密作宓。宓字子勅。當取謹宓之宓。世俗借用堂密字。

華佗。漆葉屑一斗。斗當依魏志作升。漢隸。斗作升。與升字相似。故易混耳。

費長房。而逢長房爲謁府君。漢人稱太守爲府君。然敘事之文。當從其實。此傳多采鄙俗小說。未及

釐正。若東海君、葛陂君之稱。豈可穢正史乎。

章帝時有壽光侯者。注。壽。姓也。案。壽光。國名。光武封更始子鯉爲壽光侯。又北海王晉初封壽光侯是

也。此侯失其姓名。故舉其爵。下云侯爲劾之。侯復劾之。可證注以壽爲姓之誤。

甘始、元放、延年皆爲操所錄，問其術而行之。元放、左慈之字，慈事已見前。此元放二字衍也。曹操不稱姓，亦脫文。自左慈以後，中隔計子勳、上成、公解、奴辜、張貂等數人，皆不與操同時，不當遙承其文。吾本師姓韓，字雅。裴松之注魏志，引辯道論云：姓韓，字世雄。

列女傳

曹世叔妻，令皇后諸貴人師事焉，號曰大家。此家字相傳讀如姑，考古書家室之家，亦讀爲姑。詩宜爾室家，樂爾妻帑，以家協帑。左氏傳：姪其從姑。六年其逋，逃歸其國，而棄其家，以家協姑逋。今人皆轉爲古牙切，獨此大家字尙存古音。

龐涓母，福祿長尹嘉義之。福祿當作祿福，詳見郡國志。

孝女叔先，雄爲人也。水經注：符縣長趙祉，遣吏光尼和，以永建元年十一月詣巴郡，沒死。子賢，求喪不得。女絡，年二十五歲，有二子，五歲以還。至二年二月十五日，尙不得喪，絡乃乘小船至父沒處，哀哭自沈。夢告賢曰：至二十一日，與父俱出。至日，父子果浮出江上。郡縣上言，爲之立碑。與此傳所載卽一事，而姓名互異。華陽國志亦云：符有先絡，夔道有張帛，絡與帛協韻，則其名當爲絡，不爲雄矣。水經注亦

附符有光洛二語，洛卽絡之譌。

女本姓叔先，或單稱先，猶諸葛之稱葛也。雄當是雒字之譌。雒與絡同音。國語：王孫雒。今本亦譌爲雄。

此其證也。王伯厚引水經注以爲光終終亦譌字。

西南夷傳

桓帝時郡人尹珍自以生於荒裔不知禮義乃從汝南許慎應奉受經書圖緯。案許慎與應奉不同時。奉仕桓帝朝而慎之卒蓋在安帝之世不得到桓帝也。華陽國志作明章之世則與許慎時代相反矣。但珍旣受業許慎豈能更與應奉同朝傳聞異詞要皆不足信。

西羌傳

陸渾戎自瓜州遷于伊川允姓戎遷于渭汭。東及轘轅在河南山北者號曰陰戎。案左氏傳僖二十二年秦晉遷陸渾之戎于伊川杜注允姓之戎居陸渾在秦晉西北二國誘而徙之伊川遂從戎號至今爲陸渾縣也。又昭九年晉梁丙張趯率陰戎伐潁王使詹桓伯辭于晉曰允姓之姦居于瓜州伯父惠公歸自秦而誘以來使偪我諸姬入我郊甸杜注陰戎陸渾之戎也。然則陸渾之戎系出允姓與允姓戎非二種此傳似歧而二之。

和帝永元四年訓病卒。案下文已有永元元年此又舉永元詞之贅也以傳例推之和帝二字應移在前文永元之上。

領護羌校尉衛瑤。順帝紀作衛瑒。

南匈奴傳

單于姓虛連題。注前書曰：單于姓攣鞬氏。案：連題即攣鞬之轉。

北匈奴入雲中，遂至漁陽。太守廉范擊卻之。案：范為雲中太守，太守上當有雲中二字。

屈蘭儲卑胡都須等。章帝紀：屈作屋。

北單于復為右校尉耿夔所破。右當作左。

新降一部大人阿族等遂反畔。安帝紀：南匈奴左日逐王叛。

南匈奴左部句龍王吾斯車紐等背叛。順帝紀作句龍大人，王與大人皆匈奴尊稱。譯語小異。

右部醯落與休著各胡白馬銅等十餘萬人反。靈帝紀作休屠各。案：休屠之屠音儲，而著亦音直慮切。

譯語有輕重，其實一也。烏桓鮮卑傳俱云休著屠各，此必讀范史者音著為屠。後遂撥入正文耳。晉書匈奴

傳北狄以部落為類，其入居塞者有屠各、鮮支、寇頭、烏譚等十九種，屠各最豪貴，故得為單于。

烏桓傳

因徙烏桓於上谷、漁陽、右北平、遼東五郡塞外。案：文止有四郡，蓋脫遼西二字。